



MAY 2024

VOLUME 64 | NO. 05

Christian Thukizakna



07 MISSIONARY DAY

12 NUTE' NIPINI

19 PENTECOST DAY

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulain

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

Lakman:- Kum khat ₹ 150.00;
Dak ah ₹ 200.00; Bu khat ₹ 15.00;
Gamdang US\$ 20.00

CONTENTS

1. EDITORIAL	: 01
2. NU-LE-PA LEH TATE KIPUMKHATNA	: 03
3. MISSIONARY CHIH MIN PULOU A MISSION NASEPNA	: 08
4. NU – THAWNPIAK MANTAM	: 11
5. KHA SIANGTHOU' NASEP LAMDANGTE	: 15
6. BIBLE STUDY	: 19
7. GAMMIAL AW	: 24
8. DORCAS CORNER	: 29
9. CHILDREN'S CORNER	: 31
10. EBC INNSUNG THU	: 33
11. THU TUAMTUAM	: 34
12. ORDAIN SUNNA	: 35
13. KIPATHU GENNA/ THUMNA MAKAI	: 38

Thusuah ding piakna:

Editor,
 Khristian Thukizakna
 Dorcas Hall, P. O. Box - 6,
 New Lamka,
 Manipur - 795006, India.

*Thusuah sung-a kigente
 Evangelical Baptist Convention
 Saptuam ngaihdan ahi kim kholkei.
 Thusuahte'n amau thusuah ah moh a
 pawtek ding uh.*

INKUAN KIPUMKHATNA

Ngaiin unaute kituak diamdiam a omkhawm anak hoih in anuam mahamah hi (Sam 133:1)

Amasa in inkuan kichi inn khat a tengkhawm Nu leh Pa toh Tate genna ahi. Alian zaw in gen leng inkuan in pi leh pu, ni leh gang, tu leh tate leng huam khawm hi. Inkuan i chih tuh sisan a kizopna neite genna leng ahi. Inkuan khat kichite tuh kikepna, kimakaihna, anuam leh a haksa, nopna leh dahna hunte a leng midang ngansiah/ot theih vuallouh mohpuakna kinei tuahte ahi uhi. Huaiziakin, inkuan tuh khovel a kizopna tengteng a tehpih ding omlou, atuam liuliau a Pathian in ana bawlkhiak ahi. Inkuan kichimatna suangphum Bible' gendan in "ka guh a kipan guh, ka sa a kipan sa... huchi in sa khat a hong hita ding uh" achi hi (Gen 2:23,24).

Kipumkhat chih tuh mawl chik a gen in 'kizomtuh' chihna ahi. Huai omdan bel khat akipah leh adangte leng kipak, khat in na asak leh adangte'n leng thuakkhawm uhi. A tung a igensa bang in sisan a kizopna ah leng, mohpuakna thu ah leng, anuam ah leng, ahaksa ah leng, insung thil ah chial ahih kei ua leh polam mi khatpeuh va kigolh a va kitaklah theih leng hilou hi. Huchi ahihleh inkuan akipumkhatsa ahi vele! chih theih abang hi. Himahleh, mihingte khial a puksa ngen ihihman un Pathian geldan bang a inkuan kipumkhat thil baihlam ahi kei hi.

Inkuan kipumkhat kichi thuhaksapi (complicated) khat leng ahi hi. Nupate nasan kipumkhat a kituak taka khosakkhawm mi tampite a dingin thil haksa ahi. Kiteng sawt deuhdeuh nupatdan siamlou deuhdeuh, kiduat deuhdeuh dia kilawm kichimtak gawp banga khosa om hi. Nupa hihna sihtan ading ahihlai in damlai nangawn a leng kinupa nawnlou chih omthei hi. Nupa kala kizahtak tuahna omlou, kimusit, kithupi ngaihrou, kiniamkhiak ut omlou, lawmta hoihtak hidingte melma tengkhawm hile uh kilawm nupa om theih ahi.

Insung khenkhat ah azi pen ‘insung a nasem dia ompih numei’ hileh kilawm; puan niin teng sawptu, inn hahsiangtu, anhuantu, ut hunhun a bomhuan a, utut a mohsakna tuak sek pawl leng om hi. Insung khenkhat leuleu bel numei thuthu a kivaipuak a pasal pen ‘good boy’ chihdan a om heuhau pawl leng om thei hi. Thule-la himhim vaitan a vaisai vitvit ngamlou pasal bang leng om theih ahi. Tuabang numei vaihawmna insung ah pasal pen tate nasan in zahlou in anu utoh pangkhawm uh ahihman in insung kisehkhen chih om thei hi.

Nupa khenkhat leuleu bel, amau nupa kia kituak, inkuan sung a midangte himhim toh kituah sawm lou om thei hi. Mou neihma teng inkuan kituak, mou neih apan nu-le-pa mudah, sanggam pianpihte huat bawl maimah nupa leng om theih ahi. Pi leh pute hong tek haihiai mou in kem gina nuamlou, tanu khaksaten va awlmoh bawl sim le lah non zahlaksak uh chi nuam zel. Mounu hong intek haihiai adangte mikhual haihiai inkuan pawlkhat om hi.

Inkuan kipumkhatte bel amau leh amau kideihthoh in kikem ua (Eph 5:29) inkuan a omkim chiang un nuam a kisatuah uhi. A nuikhawm ua, ahoulim ua, thuki-im, kilungsim ven geuguau cihte anei kei uhi. Insung bouruak anuam a a zangkhai hi. Nitak vai hong tungkhawm ua, common room ah atukhawm ua, tuni a athiltuahte uh report akipetuah chilchel ua, mailam kalsuan didan, insak inkhang thu agenkhawm ua, inkuan parliament ahimai hi. Inkuan kipumkhatloute bel, gam khat parliament sam ngeilou, vai kikum ngeilou toh kibang uhi. Inkuan kipumkhat tehna hoih pen khat tuh amau inkuan thu kikum in vai saikhawm dialdial uhi.

Inkuan kipumkhatna sung ah thu-le-la sai ding a om leh pi leh pu hiam pa pen kiang ah Pa/Nu bang chih ahoih dia, bang ngaihdan na nei a? chiin dot masak in nei uhi. Insung ah nu-le-pa thu lou in nna khatpeuh kipan ngeilou hi. Inkuan kituakte ah inkuan biakna aneu alian in nuam asa ua, naupangte adin khuangtum, lasak kisinna, thumdan kisinna mun, Biakin a hihding dan kisinna, nu-le-pa adia ministry poimoh leh thupi pen asuak hi. Jesu Khrist intekna insung tuh Sam 133:1 in agen “Ngaiin unaute kituak diamdiam a omkhawm a nak hoih in, anuam mahmah hi!” chi a ana gen ahi. Inkuan kipumkhat hidingin Toupan hon vualzawl chiat hen. ■

NU-LE-PA LEH TATE KIPUMKHATNA

- Rev.Dr.M. Khamkhanchin, DS/LND

Thumapi: Tukum i Saptuam' Thupi dia telkhiak "Kipumkhatna" (Ephesate 4:3) apan kahiang poimoh mahmah, May 2024 thupi di'n "***Nu-le-Pa leh Tate kipumkhatna***" chih ahieh toh kiton in tua thupi zang in kikumkhawm leng i chi hi.

Bible siam research bawlen, gamsung siatna, khotang siatna, saptuam sung keuna leh, Pathian gam nna sepna a lohsapna jia pipen hi a a muh suah uh – "*broken family*" innkuan kitamkham, *dalhjak'* a hi chi uhi. Hiai hi nupa kal buaina/meimatna in masawn/gamkek in, tate hon sukha hi phet lou in saptuam, khotang leh Pathian gam nna sepna zong supoi mahmah hi.

Pathian, innkuan a lunglut mahmah a hih man in Innkuan ana bawlkhiak na thu i Laisiangthou Genesis ah imu hi. ***Pathian in amah kibatpih in mihing a siam a; Pathian kibatpih ngei in, numei leh pasal in a siam hi. Pathian in amau a vualzawl a, a kiang uah, "Chi tampi suang in hong pung unla, leitung luah dim in, na thuthu un omsak***

un." Ana chi hi. (Gen. 1: 27-28). A siamtu lungtuak a, a vualzawl na nopsakpih a, leitung luah dim ding chih ahieh lai in melma khempuk a om in, innkuan kitamkham hong suak mai tuh, Siamtu bangzah in a lungna diam aw... hon chisak hi. Khelhna gu tuh Innkuan kipumkhatna susetu hong suak ta. Huchih lai in, Khrist Jesu vang in Innkuan Kipumkhatna bawl thei nawn ding in i om a i kipak mahmah uhi. Tu in "***Nu-le-Pa leh Tate kipumkhatna***" i chih omdan Laisiangthou honsiksak tomkim in enkhawm leng i chi hi.

I. NUPA KIPUMKHATNA:

- ✓ **Nupa kal chidamna:** Chidamna i chih chiang in i taksa tung a natna hik om louh ziaq kia hi lou in, taksa pumpi, lungsim, kha, sum leh pai leh

khotang a damna a om Chiang in CHIDAM kichi hi. Hiai “CHIDAMNA” neihna ding in lungsim lam a damna poimoh pen a, za lak ah 70 (70%) bang moh pokha chih ahi. Tua ahih man in Damna Bukim i tan theihna ding in NU lel PA khalam damna-PIANTHAKNA, Krist in a thunun hinkhua, i neih gige uh poimoh masa hi. I khalam a dam Chiang in lungsim lam zong hong dam a, pumpi taksa zong chidam in nupa kal chidamna hon tun phet lou in Innkuan chidam leh kipumkhat i hi hi.

- ✓ **Nupa kal kizopna:** Nupa i chih pen Bible in sa-khat, pum-khat ana chi hi. (Gen.2:24b). Sa-khat, pum-khat himah lehang mihing nih kigawm i hih jiak in ngaihdan, deihdan, utdan leh chidam dan kibang lou hi. Tua ahihman in ITNA taktak toh kitheihshiam leh pankhawm gige poimoh hi. Bible in zi pen kimilpih panpihtu, kithuahpihtu (suitable helper, partner) ahi chi hi. (Gen.2:18). Pasal in hon panpihtu

dia Pathian hon piak it thoh tak leh hawmthoh tak a kep poimoh in, zi in zong pasal a lutang ahih mangngilh lou a, ginomtak a panpihtu a pang gige a, kihuhutuah leh kisuk buching tuah, kipahtawituah (compliment) gige ding a Pathian siam i hi uhi.

II. INNKUAN A PATE MOH PUAKNA:

- ✓ Pate lu Krist a hi a, tua Krist in Pate innkuan a lupen hihna pia hi (1 Kor. 11:3, Eph.5:23) Lupen Grik ah árche “*hilou in*” “*Kephale*” ahi. Agape itna a ji leh tate it a thuneihna zatna ahi (1. Kor.13:1-7).
- ✓ Innkuan a siampu ahi. Gen.8:20, (Noa maitam) Job. 1:5 (Innkuan maitam). Eph.6:4 (Tate thununna a kep), Deut.6:8-9 (Pathian lauhdan leh it dan sinsakna)
- ✓ Inn a om tam- pawthat louh –Dr. Billy Graham in – “*hihkhelh lianpi ka neih tuh ka innkuante amau kia atamveipi ka nawtsiat ahi*” chi hi
- ✓ **Pate hihna nihte:**

- **Vualjawlna:** Pau. 20:7, *Midiktat tuh a ma gin-om na ah a om a, amah nung ah a tate a hong hampha uh!*
- **Hamsiatna:** Diut.5:9b - *Kei hon hote tung ah gawtna a suante uh khangthum, khang lina dong in ka tun hi.*

✓ **Chiamteh ding:**

- (i) A poimoh pen jaw, nang na sungte-tate bang na sinsak a? chih sang in, na sungten/taten nang ah bang a sinkhia ua? chih ahi jaw hi.
- (ii) Na tate na it taktak leh amau a ding in na sum hi zo lou in na hun zang zaw in.

III. NUTE MOHPUAKNA (Pau.31:10-31) Khovel ah “NU” chih kaan a lohnuam leh i loh mun omlou ding hi. Nu i chih innsung a pa hileh tate hileh lungsim kigawmkhawmna pen ahi. NU omna innsung ah “NU” chih kammal a “*thunon*” a hi mai hi. Naupangte muk ah nu chih a belh hi. W. M. William Thakeray in, “*naupangte muk ah NU min loh Pathian min loh bang a manpha ahi*” a na

chi hial hi. Paunak in, ‘*Pa in innkuan tungkhia a, nu in innluah lum hi*’ chi hi. Nu tellou in innsung kiluahlum zoulou hi.

1. PASAL TOH KAL AH:

✓ Pasalte’n bang hon hihsak thei hiam chih sang in, panpihtu (Gen. 2:18) na hihna thei gige in, “ken ka pasal a ding in bang ka hih sak thei diam aw?” chih lungput a neih hoih hi.

✓ Tate’n thil a nget Chiang un “na pa dong ni maw?” chi thei jel le uh nu in leng pate (pasalte) ajah dan uh leh nu leh pa kithulaktuah dan uh thei ding uh hi.

✓ (Ephe.5:23) Khris Saptuamte Lutang ahih mah bangin, Pasal tuh Zi Lutang ahi. Kiniamkhiak lungput toh zi ahihna a semsuaah gige ding.

✓ Thu hoih tampi gengen sang in omdan/hindan hoih tungtawn a thu gen phatuam jaw hi.

2. TATE TOH KAL AH:

✓ Nute a ding in innsung mission field leh missionary nasepna mun poimoh pen ahi. Innsung adik louh Chiang in a

dangte hihse pha hi. Tate zak a mi gensiat-mohsak kampau jat lauhuai mah mah hi. Tua a hihman in Nute tuh tate a ding a hinkhua hoih leh hoih lou pawtkhiakna tuinak ahi. Nu hoih in innsung ah, tanau laina lak ah leh polam ah leng thil thupi a sem kha hi. * Nu tuh Tate a ding in sintungbu ahi*

- ✓ Galhat minthang Nepolian in, *Nu hoih honpia un, hu chi in nam hoih ka hon pe ding'*-nam leh gam hoihna ding in nute poimoh mah mah.
- ✓ Mahatma Gandhi in-*'Pasal lai i siamsak leh mimal siam sak ihi a, numei lai i siam sak leh innkuan siam sak i hi'* çhi hi.

IV. NU-LE-PATE TUNG A TATE HIIH DING POIMOHTE:
Bible ah (Exo.20:1-17) thupiak 10 poimoh mahmah i mu hi. Thupiak 10te chi nih in khen theih: (i) Thupiak 10 lak a, 1na – 4na: Mihing leh Pathian kal a ding ahi a, (ii) 5na – 10na: Mihing leh mihing kal a zat ding a hi, hiai lak a a masa pen: ***“Na nu leh na pa zahtak in: Toupa na Pathian in a honpiak gam a na nite a***

sawt theihna ding in” (v.12) cf Ephes.6:1. Kol.3:20 “

Nu-le-pate Lei pathian ahi uh: Nu-le-pate ‘aw’ Pathian ‘aw’ ahi...chileng genkhial lou ding ihi!! (Eph.6:1; Kol.3:20) *“naupangte aw **bangkim ah** nanute uleh napate uh thumang un.* (Hiai tana khawl lou...) *Huai lah **Toupa pahtaklam** ahi ngala”*

Nu-le-Pate leitung pathian hi uhi. Nu-le-paten tate leh tute khankhua a ding in hihtheih poimohtak nei uh chihna hi a, huai tuh VUALZAWLTHEIHNA (Pathian in leitung nu-le-pate tungtawn in tate leh tute vualzawl sek ana hi, chih mangngilh louh hial ding ahi. Nu-le-pate pahtawi leh zahtak a a om Chiang un, Pathian thuchiam tangchinna/bukimna hi a, nu-le-pa leng kipak ua, a kipahna uh tate a ding in vualzawl na, lamzanna ahi hi. Nu-le-pate khase tak a koikhkhak in vualzawl na muh ding dal thei in inn-gou gamna hiam khang kibansapna tan tunthei hi.

Tua ahihman in, Nu-le-Pate manphat dan thei a, a upat tan ua leng zah ding bang tak a zah a, itsiam tak leh hawmthohtak a kep leh etkol ngeingei ding tate

mohpuak ahi. Khasiat gukna a neih khak ding uh veng a duat tak a etkol ding ahi.

V. CHOUNA/THUKHITNA:

Laphuak tu'n "Innsung nuam zaw van gam nai pen ahi" achi phawk in 'Vangam chiam lawk' innkuan i hih chiat i kideihsak mahmah uhi. Tua tan a khawl lou in, midangte zong lohsawn/joh ding Topa'n hon deih leh ngiat ahihman in Nu-le-Pa leh Tate Kipumkhatna Innsung bawlkhe chiat ding in hiai bang in panla chiat leng.

1. *Innsung bouruak nuam leh hoih bawl khiak ngeingei ding.*
2. *Innsung maitam pibawl mahmah ding- tate lunglut theih dingdan a sai dan siam poimoh mahmah hi.*
3. *Khristian innkuan' lawm hoihpen Bible a hih ngeingei ding.*
4. *La a phat khawmna- tate eila sak theih sak/siam sak ngeingei ding.*
5. *Innkuan a thumkhawm liailiai thei hih ngeingei ding.*
6. *Innkuan, kilawptak a Pathian biakbuk naihkhawm siausiau thei hih ding.*
7. *Pathian gam nasepna, hihtheih dandan a*

pangchiat dia aneupen leng ki hanthawn ding.

8. *Tagah, genthei leh liangvaite veh, panpih, huhna piak kithalawp sak ding.*
9. *Missionary nasepna a pang theih dan chiat a pang ding a kihanthawn thei inkuan hih ding.*
10. *Hinna/Hindan (Life style) a Khrist tangkoupih / theihpihtu inkuan hih ding*

A tawppen in: I innsung, i mission field nai pen "A KIPUMKHAT" Pathian lalgam suahsak i mohpuak gol pen ahi hi. I Topa'n hon lamet dan, a tung a thukup i neihte banga, pa in pa hihna thei in, nu in nu hihna, thei in leh taten tate hihna thei in i mohpuakna bang chiat uh sem khe leng, INNSUNG tunding in a om ding a, innkuan Pathian lalgam hong suak ding a, innkuan, Pathian in A thupina leh Gospel thehzaktu in hon zang thei ding a- NU-LE-PA LEH TATE KIPUMKHATNA- Van gam naipen eite a hong hita ding hi. Simtute tengteng Toupa'n Innsung nuam, Vagam naipen bawlkhe thei ding in hon ompih in, hon vualjawl chiat ta hen. AMEN. ■

Missionary Day Message

MISSIONARY CHIH MIN PULOU A MISSION NASEPNA

- Rev. Kamchinkhup, *Director of Missions*

Sawltak Paul bang a kuankhia a ‘midang suangphumsa tung a lem’ (Rom 15:20) hilou a Pathian’ Mission sem a malakna pen Toupa hon sawlna ahih bang in alou theilou a poimoh ahi. Pathian makaihna toh i saptuam in leng i kipuankhiakna ah “pangkhwam a napi a neih ding” chi in Pathian’ Mission hihtheih bangbang in i sem uhi. I kiim a i batphak dia om unau Karbi leh Meiteite lak ah pan in, sim lam a i unaute lak bang, India gamthuk lam bang, Nepal ah, tua dan a malatou zel in, tuchiang ah gam (nation) tuamtuum sawm-le-thum bang ah Pathian hehpihna ziak liauliau in i sem hi. Pathian in pha asakleh, sawm-le-nga phapah ding in i lamen lai hi. Hiai bang a i septheihna dia kuankhia missionaryte thupi i sa a, amaute kalsuan kilawmsa a zahna pia in Pathian thupina i khusak hi! Hiai kalsuanna phungvuhna a pang thumtu, petu leh vaisaitute tung a leng i kipak a, Pathian i phat hi!

Hiai banga i septouhna ah, Tanchinhoih lam a kikhak gamte i lut Chiang in missionary chih min pulou himahleh missionaryte nasep mah, Pathian’ Mission sem ding in tamtak i lut uhi. Hiai pen gamdang a sep dan dia poimoh danlel a ngaihdan i neih lai in, i tenna gam manohna lam i gel Chiang in hiai dan mah India ah aloutheilou a poimoh ding hong bang hi! Huai ding a leng kisakhoh a sep poimoh ahi chih dinmun a ding i bangta hi.

Hiai dan nasepna pen ei a ding in a thak himahleh, kum zabi khatna a Khristianna kipatchil a mission nasep bulpatdan na hi a, Laisiangthou hunlai a te paidan leh sinsakna leng ana hizaw hi. Sawltak Paul in Korinth khua ah a sep in nupa khat Pricilla leh Akuila toh semkhwam uh a, huai mun ah “puanin bawl” chih a theih a om kawm in Pathian mission sem uhi (Nas 18:3). Tua bang in, Thukhun Lui hun ah Pathian theiloute lak ah Joseph

leh Danielte mahleng kumpi nasem himahleh uh Pathian vanzat thupitak suak in, amaute tungtawn in Pathian' mission kisem hi.

Hiaite tungvum ah, Jesu Khrist in nungzui masate a sawlkhiak in “Ngai dih ua, **ngia lak a belum om bang in k'on sawlkhia hi: gul bang a pilvang, vakhu bang a poi khoihlou** in om un” chi hi. Nge hon lak ah belum in bangchi in a sem thei mahmah dia? Vakhu bang a poikhoihlou lah gul bang a a sepnop semkhe dia pilvang a sep ding chih ahi. Hiai a Toupa sinsakna mah sinsak sawn in Peter in, “Jentelte lak a na tatdan uh kilawmtak hi hen, huchi in thilhihkhial a, a hon gensiat Chiang un leng na thil hoih hih a muhte uh ziak in vaha a om Chiang un Pathian a pahtawi thei ding uhi.” chi hi (1 Pet. 2:12). Sawltak Paul in Kolosa saptuamte kiang ah, a nekzonna nasep uh pansan a Pathian mission sem ding in na hanthawn hi. “Huan na hih peuhmah uh thugen ah leh thilhih ah amah ziak a Pa Pathian kiang a kipahtugen kawm in Toupa Jesu min in hihvek un.” (Kol 3:17). Sikhate

lak ah hiai mah gen in, “Toupa Jesu Khrist nasemte na hi uh” chi hial hi (Kol 3:24). Jesu Khrist sinsakna mah paipih in “Hun na neih sung un a tam theipen semzel unla, pawlam mite lak ah piltak in om un,” (Kol 4:5) chi in ana gelh hi.

I tenna leh i sepn gam ah, Missionary chih min pulou a Mission nasep ding poimohna hong let hiaihai lai in, Toupa'n i ma hon pii in saptuamte hon sakhoh in i mu a, i kipak mahmah hi. Mission field a i puan a, missionary min a i kuantheihnate ban ah, India khopi lian tamtak ah nekzonna tuamtuam nei in saptuam mite theihzak in i om hi. Hiai bang a Toupa'n saptuam mite nekzonna a piak a, hiai munte a akoih mimalmalte ban ah saptuam a ding mah in leng aziak poimoh tak om ding ahi chih louh theihlouh ahi. A ziak tuhun in hong Chiang mahmah ta ahi diam hon chisak hi. Nekzonna Dohkan Pulpit Nasepna [NDPN] pansan a i kalsuanna in a semsa leh a semthei dingte hiai bang ding a thopna pekha thei ding in Toupa'n hon makaih a, i kipak mahmah hi!

NDPN tungtawn in tulet in lam chi tuamtuam guk(6) ah tangpanna i nei hi. I kizoppih mission agencyte tungtawn a kuankhe nuamte a ding in **Missionary Associates** kichi hi. Laizil a hiai tungtawn a Pathian Mission semnuamte a ding in leng **College Students** chi in kong i hong a, hiaite lak ah panpihna poimohte a ding in National Mission Consultation toh pangkhawm a sep theihdan om hiam i chi hi. Lai zilsiamna nei khin sepna zong a, sepna tungtawn a Pathian' Mission sem nuamte a ding in **Coaching Career** chi in a poimoh bang in i kipanpih hi. Laisiamna lam lou, khutsiamna tungtawn a Pathian' Mission sem nuamte a ding in **Vocational Training** tungtawn in kong i hong a, kisinsiamna a hong neih ua hiai bang a sep ding uh i ngim hi. Sumsinna tungtawn a Pathian' Mission semnuamte a ding in leng **Startup Business** chi in sumsinna neu a kipan nuamte a ding in huhtheihna lampi i bawl hi. A tung a "missionary" chih minpu khaloute a bulpatpihna i neihih a nekwonna nei a hong om Chiang un **Working Professional** hong hi in, a semsa na omte

toh hiai tungtawn a Pathian' Mission sep ding i ngim hi. Pathian ompihna lam in April 19 apan in May 11 kikal ah mun tuamtuam Guwahati, Delhi, Bangalore, Aizawl leh Lamka ah NDPN Seminar 2024 kinei hi. Hiaite chik laipeuh a Pastorte tungtawn a kan a hamphatpih theih dia kong kihong ahihna ah kal suankhawm leng i chi hi.

Missionary min mah pu a i septheihna munte ah, tua bang a septheih sung teng tha-ittak a sem in, pilvan a ngaihate ah i missionary muan mahmahte thopna chithuam deuh a kithuam ding in leng i kisa hi. NDPN tungtawn a semte toh pankhawm a poimohnate ah leng pangkhawm in Pathian' Mission sep teitei i sawm hi. I gamsung paidan et in, mission nasepna toh kisai in "ni hoih" chih sang in "ni hoihlou" lam manoh i batna a om mahmah hi. Himahleh, Khristian-na kipatchil kum zabi khatna a haksatna, dalna leh sawina tampi lak a Pathian' aw, "A pilloute bang hilou in, a pilte bang in, na nuntak dan uah pilvang unla, nite a hoihlou ahihman in, aman pia in hunlem lei zel un" (Efe 5:15,16)

chih i zuih ding poimoh semsem hi.

A lemchanglou, a haksa leh lauhuai a tampi om mahleh hiai Tanchihoih sang a thupi zaw buaipih ding leh zuak ding i nei kei himhim hi! Huaiziaik in, thumna tamsem, thilpiak tamsem leh taksuahna tamsem i poimoh hi. A kuankhia a i pankei leh a phungvuhtu a pan ding chih thudik ban kalkhat i suan lai a, i omna munmun a, i

sepsep tungtawn a missionary chih min pukha in pukhakei taleng i omdan leh kampaute tungtawn a Pathian' Mission nasep hun a ding kholdiakte i hi hi. Toupa'n hiai bang lungput nei a, Amah a dia kizang bei thei ding in hon vualzawl hen!

Amah a kipan leh amah ziak leh amah ading in thil tengteng a hongom ahi ngal a; amah kiang ah tangtawn in thupina om hen. Amen. [Rom 11: 36] ■

Nute Ni/Dorcas Day Message

NU – THAWNPIAK MANTAM

- Mrs. Nemngaih mawi, Dorcas Coordinator

Achitnate ziak a NUTE' Nipini leh DORCAS DAY kigawm a ei asaptuam in i zatkhawm zel hun manpha hon musak a hinna hon hawisak lailai Toupa min i phat masa hi. Hondampa Jesu Khrist min in itna chibai k'on buk hi.

Nute Pathian thawnpiak ahi: 'NU' hi in 'NUMEI PAWL' hitaleh Pathian khutsuak, 'a nu' (Female) thilsiam dangte a dia thawnpiak mantam thildang himhim toh tehpih bei a hamphatna leh hihna tungtuang neite ihi chih i kiphawk deihhuai i sa hi. Inkuan ah nute a lungphu (heart beat) a hi ua; amau lou in nungak leh tangval deihhuai

taktakte pianglou ding hi. I NUTE chiat ei a ding a Pathian tel bukim leh vualzawl na a hon thawnpiak thupi ahi chih thei thakthak ni. Khovel pumpi a hunpi kizangte lak a kuapeuh in a hihna bangtak a zat teitei ut a nuam i sak penpen tuh Nute' ni ahi. Nute' hihna taktak a kigenkhak theihna i kipahna, itna leh hihkhelhte ngaihdam ngetna i bawl theihna hun

poimoh mahmah ahi. Kuapeuh in thilthawnpiak (gift) dong khangei ding in i kigingta hi. Thawnpiak himhim a mantawm in, hoihipen kei mahleh i kipahpih a, a dong khate hampaha i kisa mahmah hi. Dawr thupitak, van chikim ahoih penpente omna hi in, online tungtawn hiam ah zong mah le'ng 'NU' kimu lou ding hi. Khovel vak na muhna ding a sisan naisan toh hon hingkhia na 'NU' Pathian in a thawn a hon piak a hi. Thawnpiak chituamtuan Pathian a kipan in i mu a, himahleh 'NU' chih ding honpiak kankan a manpha, mantam leitung ah omlou ding hi. Amah tuh a tate itna a kipumpiak in a taksa teng tum hi. Tuni a na hihna tan na tuntheihna ding a itna khut a hon pom, hon angsiaha a anglum a hon khoilian 'I NU' Pathian a kipan ahi chih mangngilh ngeikei ni.

Nute itna thupi: Pathian in numeite NU hiding a hon telna dinmun poimoh petmah ahi. Ngai in tate tuh Toupa apan i goutanahiua:gilagahkipahman a hon piak ahi. Hatlai tate mihat khut a thaltangte bang a hi uhi. A thalbawm thal a dim neite kipaktak in a omzel uhi. Kulh

kong a doute uh a biaklai un leng a zahlak kei ding uhi (Sam 127:3-5). Nute'n chituambikna leh hun haksatak lak a poimoh bikna i tate hinkhua ah i nei hi. Tate kem ding, hahsiang ding, khangsak ding, hasot ding, sinsak ding, hilh ding, thunun ding, kawi ding leh itna toh pom gige ding a sap ahi uhi. A siat a phat un leng tate' a ding in Nu' itna tuh Pathian in hon itna bangbang a hi gige hi. Nu in a ta a it bang in leh a hehnep bang in ke'n leng k'on lainat hi chiin Pathian in thuchiam bawl hi (Isai 16:13). Jesu'n Jerusalem a lut di kuan in a kahkhum a, 'Aw Jerusalem, Jerusalem... akpi in a noute a khanuai a a opkhum bang in na tate bangzah vei opkhum ka tum a?' chi hi. Jerusalem tate a itna akpi'n a noute a itdan toh tehkak hi. Akpi, ganhing nasan in a noute gilou leh lauhuaite lak a kipan hondam ding in a khanuai ah sel in a opkhum hi. Akpi sang a manpha zawtham mihing ngaihtuahna nei, mihingte itna laktak a itna tungnung tate a ding a kiluikhia NUTE ahi. La phuaktu'n, 'Nu angsung lumpen, a nungzang ah ihmud limpen' a chih bang in a itna sung a kipumngak a lungmuang

mahmah tate i hi. Tate a ding a a nuam leh khum mahmah tuh NU' itna khut a a hon kawu uh ahi. Nute'n a gil ua honpai ua kipan in khut a hon dom in a pheitung ua kipaktak a hon pom bang uh itna koimah a omlou hi. I deihman a tel hilou, sum a lei ding hileh leitung mi hausa penpen in leng a lei zohlouh ding khop a mantam tuni a i nute chiat a hihdan phawk in a mantam dan uh sut thakthak le i it semsem ding hi. Pathian hon it na a thupi dan mihing kam a i gen chiang theihna omsun tuh Nu itna michih in i tandan ah kilang hi. Hitheilou, manlou, peihlou, ka ning, ka tawp chih himhim omlou in ta leh naute etkolna, pasalte panpihna ah, inkuanpihte a dia kizang in nute'n a hinna uh pumpiak in kilui kheden uhi (Pau.31: 11-27). Nu' itna bei ngeilou hi. 'Nu hihna ah a tawptheilou thuzohna leh thilhihtheihna om hi' chiin Julie B. Beck in gen hi.

Bible a numei thupite: Bible ah numei thupi leh mantam tampite lak ah thumte tanchin saulou i en ding:

Hannah, Samuel' Nu: Hannah, numei chiing ahi a, tapa deih in Toupa kiang ah a lungsim

tengteng sungbua in a thum hi. Toupa'n tapa a piak leh, ama'n leng Pathian thupina ding a pethuk ding in thuchiam bawl hi (1Sam 1:10-11). Pathian in a thumna za in a lohching sak a, tapa a pia hi. A thuchiam bang in a ta in nawinek a tawp in Pathian nna a damsung a sem ding in Eli kiang ah a omsak hi. Pathian a dia a kipumpiakna, a tapa a it mahmah a piakkiakna ah kilang in a thupi hi. Samuel, Siampu Eli kiang ah Toupa in kongkhakte hong leh a thute sin in a om hi. Huai lai in Toupa thutung a vang mahmah laitak, a langtang a kilakna leng a omlouh lai in, Pathian thuguk tunna ding muanhuai in Samuel seh in a om a, Eli inkuan tungtang thu a thiltung dingte a gen hi(1Sam.3:1-18). Hannah in Toupa a itna zia in a thu sinding in a tapa Samuel pephal kei leh, hiaibang hamphatna tanglou ding hi.

2. Jokebed, Mosi' Nu: Pharoah thupiak khauhtak hinapi in Mosi kha 3 sung a sel hi. A sel zoh nawnlouh nung in phaiphek bawm a bawlsak a, vahaibuan leh chim in a zutbit a, a sung ah naungek (Mosi) a koih a; luipang ah loupa kawm ah a koih hi (Exo.2:3). Pharoah

tanu ksil ding lui a hong pai leh naungek Mosi phaiphok bawm sung a kikoih mu in amah ta ding in a la hi. A dontu ding in Mosi Nu mah in hamphatna a mu hi. Pharoah insung ah a khanlet dong Mosi nu'n amah tapa mah hoihtak in a kem hi. Mosi in Aigupta siamna, pilna teng a sin banah amah pianna Nu in Pathian namtel ahih na, a chipihte, unaute it ding leh Pathian it ding a hihdan sit neilou in a it mahmah a tapa sinsak hi. Jokebed in a tapa Mosi sinsak kei leh Israeltate itna neilou ding a, Pathian in amaute pikhe ding in sawl chitchiat khalou thei hi. Nu' sinsakna manpha in thupi na tel e! 'A paina ding lampi ah naupang chil in, huan a upat hun nangawn in leng huai akipan a paimang kei ding hi' (Pau.22:6).

3. Mari, Jesu' Nu: Mary, i Toupa Jesu' Nu, nungak siangthou himahleh Angel Gabriel in, 'Tapa na nei ding a, a min din Jesu na sa ding' chih hilh in a om hi. A tung in haksa sa mah leh angel in a tung a thiltung ding a gen bangbang a tun theihna ding in, 'Toupa sikhanu ka hi, na thu bangzel in ka tung ah tung hen' chi in

Toupa nasem ding in a hinna kipumpiak hi. Toupa thu bang hilou ding hileh huai hunlai in pasal neilou pi a naupai pen thil mulkimhuai sihtheihna dinmun ahi. Simeon in Mari kiang ah, 'Ngai in, hiai naupang Israel lak a mi tampi pukna ding leh dinkhiakna ding a seh a hi, gensiat a om chiamtehna hi ding in leng. Ahi, nang lungtang leng namsau in a dawt paillet ding a; huchi a mi tampi in a lungtang ua a ngaihtuahte uh a latna ding in' chi hi (Luke 2:34-35). Thawnpiak thupi penpen Tangtawn hinna i ngah na ding a Jesu Khrist hongpian na ding a tel a om numei, Mary ahi. Mary bang a nu mantam hithei sam ding in Pathian in a vualzawl na goutante tungtawn in hon tel hi.

Thukhitna: Pathian in a tate Tangtawn hinna a hon piak, amahmah in a Tapa tungtawn a huai hinna ei a dia a hon luikhiak a hi. Ei a ding in senna ding himhim omlou in a thawn liauliau ahi. Tangtawn hinna banah leitung a i poimoh bangkim intenlouten, khosakna, chidam-ludamna, silh leh ten, nek leh dawn bangkim kiching in hon pelai hi. Huchi a khasathei

ding a i poimoh ei sang a thei a hon khotuahna ziak in i Nute chiat hon pia hi. Hamphathuai petmah hi. Kei a ding in Ka NU Pathian a kipan thawnpiak ahi, ka kipak i chikei dia hia? Tuni in Nu a na hitate leh i Nute hinkhua chiat en le'ng i muhtheih thupi mahmah tuh kipumpiak lungtang, amau a ding sang a tate a ding a itna, pilna leh theihna teng suakhia a ginomna toh tate khanletna ding in a hun tengteng uh zang uhi. Nu, Pathian limsak in Nu hihna hua in a ning ngeikei hi. Nu khenkhat in amau hinkhiaklough tate kem a om khading, amaute'n leng ittak a theihtawp suah in a damsung

a hihtheihna chiang uah kem ding uhi. Himahleh naa sa a kize ngeingei a khovel vak, Pathian thilsiamte mu ding a hon hingkhia a hon khoilian tu na 'NU' it in aw! Pathian a kipan vualzawl na leh thilpiak mantam a hi. Mi' nute bang in pil, fel, melhoih laisiam leh kizen ahi kei maithei himahleh nang adia a hihtheihna tengteng a hon kemtu, mantam leh manpha penpen ahizhiak in na it teitei ding ahi. Nang hon suang na pa thu ngaikhia in la, a upat chiang in na nu musit ken. Na nu leh na pa kipaksak inla, nang hon suang nu nuamsa sak in (Pau.23:22,25). Toupa'n hon vualzawl hen. ■

Pentecost Day Message

KHA SIANGTHOU' NASEP LAMDANGTE

- Rev Nenglian Vualnam, *Director Development*

“Pentikost” thumal “*penta*” (*Gk.*) apan kilakhia “sawmnga” hiam “sawmngana” (50na) chihna ahi.¹ Thukhun Lui hun in Judate adi'n hunbi poimoh mahmah “Nipikal Ankuangluina” (feast of weeks) ahi (Exo.34:22; Deut.16:10,16). Huai tuh a hunbi poimoh dang uh ‘Paikan Ankuangluina’ (Feast of Passover) zoh a Haithak Latni (Nipini) masapen apan simtough a ni 50 chin ni geih ahi. Buhlak zoh chiamtehna ni leng ahiman in “Pawltak Ankuangluina” leng kichi hi (Num.28:26f; Lev.23:15f). Hiai ni tuh khawmpi siangthou ahiman in kuaman nna semlou a atan ding uh, chih ahi (Lev.23:21).

1 <https://todaydevotional.com/blog/what-is-pentecost-and-its-significance>

Huai Judate' Haithak Latni (Nipini) bel Siampu in Sabbath ni' zingchiang a buhphal avei ni ahi (Lev.23:11). Hiai ni toh hankhuk a sihna apan Toupa Jesu a thohnawnni (Easter Sunday) kituak hi. Easter Sunday apan simtouh a ni 50 chin ni tuh Nasepte 2:1 a kigen "Pentikost ni" geih ahi. Himahleh, Thukhun Lui dan hinawn lou in, Nasepte 1:4 leh 1:8 a Toupa' thuchiam tangtunna ni ahihtak man in, Pentikost ni tuh Kha Siangthou nasep lamdang leh manpha penpen a hongtun ni asuak hi.

Hiai Pentikost ni leh huai nung a Kha Siangthou nasep lamdangte hiai ah tamlou i taklang ding.

1. Kha Siangthou in avek un aluahdim hi (Nas.2:4a): Thawmging thupitak nei a van apan hongpai Kha Siangthou in Pentikost ni in gingtute omkhawmna inn aluahdimta a (2:2), huai hun mah in Kha Siangthou in gingtute avek un *aluahdimta* hi. Lamdangtak a Kha Siangthou in gingtute aluahdimna thu hiai ah kimu hi. Huai tuh Toupa Jesu'n a nungzuite kiang a athuchiam tangtunna ahi (Jn.14:16-17;

Ref. Jer.31:31-34). *Huan Pa ka ngen dia, ama'n Khamuanpa dang ahon pe ding, tangtawn a na kiang ua om ding in; huai thutak Kha; khovel in aneih theih louh ahi, amah amuh louh a, atheih louh behlap ziak in; nou amah na thei ua, na kiang uah a om gige ngal a, noumau sung ah a om ding hi* (Jn. 14:16-17). Hiai a thumal "om" kichi *ompih gige, tenkhawmpih (abide, dwell)* genna ahi a, *noumau sung ah a om ding* kichi in *sungluah a ompih denta ding* genna leng ahi (BI). Pentikost ni in hiai thuchiam ahong tangtungta hi. Hon ompih den ding Khamuanpa leh Panpihpa neite i hita.

2. Kha in hihtheihna apiak bangzel in pau dangte in apautauhi (Nas.2:4b): Pentikost ni a Kha Siangthou nasep lamdang mahmah nawn tuh gingtute thunun in hihtheihna pia a, pau tuamte in pausak hi. *Pau theihlauh* hilou in *pau tuamte* in pausak hi. Pentikost ni a hongtung Kha Siangthou in hon sungluah in hon ompih den hi, chih mai hilou in, *hihtheihna* tuamtuam in hon tuam lai hi. Hiai thilhihtheihna mu ding, tang ding, leh zangkhe thei ding in Kha Siangthou sungluah a

om hinkhua neih poimoh masa hi. Huai Kha Siangthou na tangta hia?

3. Hangsanna pia (Nas.2:14): Pentikost ni a Kha siangthou nasep lamdang mahmah dang khat ahiehleh *hangsanna dik* pia hi. Bangmah theihchet louh ziaak a pum hangsanna thoh mai hilou in, theihitelna hoihtak toh Kha thopna tang a hangsanna ahi. Huai tuh tangthupha gum a hangsanna ahi a, *hangsanna dik* ahi. Peter leh nungzui dangte, a makaipa uh matsak a om a Kros a khaikang a om nung a vualleltak a om uh himahleh Kha thop a om in tangthupha ziaak a mipi mai singam ding khop in hong hangsanna uhi. Tuni'n eite' hansanpih bang ahi de aw? Hiai tangthupha gum in i hangsanna hia, tangthupha hinpih zou ding khop in i hangsanna huntawh hia (Phil.1:27), bang pentak hansanpih i hia, chihte kidot tham ching thu poimoh ahi.

4. Kisikna dik tungsak (Nas.2:37-41): Kha Siangthou in kisikna lamdangtak tungsak hi. Mipite'n Peter thugen azak Chiang un alungtang uh asun om bang hial a sukha in lungtang tawng apan kisikna

leh lungsim khekna nei in huai ni a baptesma tang mi 3000 vel pha uhi. Khovel khangthu a Chialpi lohching masapen ahi. Kisikna diktak tuh potham lel a poisakna leh thil khatpeuh hoihsak nawn louh ziaak a ningkitelna hilou in, lungtang tawng apan lungsim khekna leh Pathian thu zuihna ahi zaw hi (v.41). Hiai tuh Kha Siangthou nasep liauliau ahi.

5. Kikimlualna omsak (Nas.2:44-45): Kha Siangthou nasep lamdang mahmah tuh kikimlualna omsak ahi. Pentikost ni a huai Kha Siangthou sungluahna tang a Pathian thu zuite lak ah kikimlualna lamdangtak hongtung hi. Huai bel, a nei zaw, thei zaw, hat zaw, tungnung zaw, hiam ahiehkeileh nuainung zaw hiam omlou in neih bangbang kikop vek thei ding khop a kikimlualna ahi. Hiai tuh thil lamdang mahmah Kha Siangthou nasep ahi.

6. Nopsakna leh Lungkimna tun (Nas.2:46): Kha Siangthou sungluahna tang a huai Kha thunun hinkhua a hingte'n hongtung bangbang ah nopsakna leh lungkimtak a om theihna thuguk nei uhi.

Hiai tuh Kha a dim hinkhua ahi- nopsakna leh lungkim theihna. Khalam a mi ahong keu luat Chiang in lungkim theihlouhna leh ning kitelna hong om in midangte iplahna leh mohsakna hong lian hi. Kha a hingte adi'n bel bangkim Toupa apan ahi zaw hi.

7. Huhna pia (Jn.14:16): Kha Siangthou min masa tuh "huhtu dang" (another helper) chih ahi.² Aman thil bangkim ah gingtute ahon huh zel hi (Rom.8:26). Sam laibu ah Chiangtak in hichi'n kigelh hi: *Pathian i kihumbitna leh i hatna, mangbat lai a huh pahpapha nai gige ahi (46:1)*, chi in. Panpihtu leh Huhtu muanhuai hon ompih gige nei i hi a, lungmuan huai mahmah hi.

8. Kipumkhatna tungsak (Jn.17:20,23): Jesu'n nungzuite pumkhat ahihna ding ua a Pa' kiang a anget pen Kha Siangthou nasepna tungtawn kia in tangtun theih ding hi. A ziak bel Eph. 4:3 ah kipumkhatna Kha Siangthou tungtawn a piak a om ahihdan kimu hi. Gingtute kipumkhat theihna tuh Kha Siangthou

nasep ahi a, Kha Siangthou thunun hinkhua tellou in hiai kipumkhatna tuh thil hi theilou ahi. Kha Siangthou i poimoh ngei e maw.

9. Kha gah suangkha (Gal.5:22-23): Kha Siangthou nasep poimoh mahmah khat nawn tuh *gah suang* ahi. Huai tuh **Kha gah** kichi hi. Kha Siangthou in mi' hinkhua a thunun Chiang in **Kha gah** suangkha a, huaite bel itna, kipahna, lemna, thuaktheihna, migitna, hoihna, muanhuaina, nunnemna, kidektheihna ahi. Hiai bang gah suang ding in Kha thunun in i om hiam (Jn.15:1-11), chih kivel thak chiat ni.

10. Kha thilpiak tuamtuam om (Rom.12:6-8;1Kor.12:27-30; Eph.4:11-16): Pathian Saptuam a michih kiphattuampih chiatna ding in khalam thilpiak tuamtuam a om hi. Himahleh, Kha bel khat ahi. Gingtute zang a Saptuam lamtouh ding Pathian deihdan ahi. Hiai nna sepkiak ahihtheihna ding in Kha thilpiakte piak in ki om chiat hi. Nang bang thilpiak na tangkha ale?

² Sandeep Poonen in Jesu'n Kha Siangthou pen huhtu dang (another helper) chi in gen a, huhtu masa tuh Jesu ahi, chi hi. Ref. Sandeep Poonen, *The Spirit-Filled Life: Our New Covenant Privilege*, (Bangalore: Christian Fellowship Church, 2017), p.32.

11. Kha in thutak hon theisak (1 Kor.2:10-15): Jesu'n a nungzuite kiang ah, "Himahleh, Thuthak Kha a hong tun Chiang in, thutak tengteng ah nou ahon pi ding," achi hi. Kha Siangthou in thutak hon theisak in huai thutak ah honpi zel hi. Pathian thugilte Kha lou a theihtheih ahihlouh ziaak in khovel mi'n Pathian Kha thilpiakte a sang kei nak uhi. Huai thutak theitheih ding leh Pathian adia hinkho manpha a hing thei ding in Kha sungluah in na omta hia?

Thukhitna: Kha Siangthou lou in Kham thilte theihtheih

hilou hi. Huai Kha Siangthou hon sungluah, ei a om gige in, kham thilte hon theisak zel hi. Kha Siangthou tenna i hihtak ziaak in i pumpi leng Kha Siangthou Temple ahong hita hi (1Kor.6:19). Huai ban ah, tatna ni ading in hiai Kha Siangthou ah chiamteh in i om uhi (Eph.4:30). Huai ziaak in, Kha Siangthou hihlungkham louh ding ahi. Kha gah i neih theihna ding in Kha in api hinkhua poimoh hi. Hiai bang hinkhua manpha nei thei chiat ding in Toupa'n kuapeuh hon ompih in hon vualzawl chiat hen aw. ■

BIBLE STUDY



Pastor Khamkhanchin Ngaihte, Local Pastor, EBCC Zion

Text : EPHESATE 1:15-23

Thupi : Paul Kipahthu genna leh Thumna

Thumasa. Kha masa in Ephesate 1:3-14 sung ah gingtute'n Jesu Khrist a aki ningching kham hamphatna I tante ina sin khawm ta uhi. Tu in, a tung a kigen Kham hamphatna or vualzawl nate ziaak a Paul in Pathian phat a kipahthu a genna tawh kisai I sinkhawm ding (1:15-23). Gingtute'n Khrist a hauhsakna ichi hiam kham vualzawl na kiningchingtak a neihte uh a theihshiam ua, a kipahpih ding uh Paul in a deih a, huai ding in a thum chih a taklang hi.

Bung 1:15-23 hilhchetna.

Tang 15-16. "Huaiziak in ke'n leng Toupa Jesu a ginna na lak ua om leh misiangthoute

tengteng tung a na itna uh kazak in, ka thumnate ah na min uh lou in nou ziaak a kipahthu gen ka tawp kei hi."

Tang 15na a “Huaiziak in, ke’n leng...” achih in a tung a tang 3-14 sung a Pathian’ nasep, huai tuh-gingtute Khrist a khalam hamphatna thupitak a piak-pansan a Paul in leng Ephesa a gingtute’ hinkhua a thil nih kilang mahmah – a ginna uleh a itna uh – ziak in Pathian kiang ah kipahtu a gen chi ahi. Ephesa a gingtute’n Jesu Khrist a **ginna** uleh gingu ahihpil uh midangte a **itna** uh ziak a tawplou a Pathian kiang a kipahtu gen ahihthu Paul in a hilh hi. Gingu khatpeuh hinkhua a sel vuallouh a a kilang gige ding tuh I ginna leh a itna ahi mah ahi.

Tang 17-18. *“I Toupa Jesu Khrist Pathian, thupina Pa’n, amah theihna lam thu a pilna leh kilakna kha nou a hon piak theihna ding in. Huchi a na lungsim mitte uh hihvak ahiah, ama’n nou a hon sapna lam-etna bang leh misiangthoute a gouluah hauhsaknate na theihna ding un.”*

Tang 16 a Paul in ka *thumnate ah* achih a a thumna ziak leh tup(purpose) tang 17 a gen in, tang 18 ah a gahsua (result) ding gen hi. Paul thumna in atup ahiahleh, Pathian

theihna lam a gingtute a khamsemna ding uleh, huai ding a Khasiangthou in pilna (wisdom) leh theihshiamtheihna lungtang a piakna ding ahi. Tang 17 a “kilakna kha” (spirit of revelation) in Pathian thilgeel te theihshiamtheihna (insight) leh theihkaak theihna (discernment), Kha tungtawn a gingtute kiang a piak a om genna ahi.

Tang 18na a “huchi a” chih in a gah/result ding lam a kawki hi. Huaituh- “Na theihshiamna mitte uh a vaksak a, ama’ hon sapna bang lam-etna (hope) hihiam, chih leh misiangthoute a ama’ gouluah thupi hauhnate bang hihiam, chih na theihna ding un” (BI)achi. “Na lungsim mitte uh” kichi English ah “na lungtang mitte uh” (the eyes of your heart) ahi. Laisiangthou a “lungtang” (heart) a kizat Chiang in mihing hihna bulpi/ngaihtuahna leh khawphawk theihna tengteng ki patna/tawphah genna ahi a, a bulpi petmah ahi. Gingtute lungtang tawng ahikheileh a khawphawktheihna uh phungpi hihvak/tatvak ahiahchiang in tua in Pathian thilgeel thupi taktakte theishiam in Pathian ta ahiahna

ua a gouluah ding uh khalam vualzawlna kiningchingte kipahpih thei ua, huaimah tuh Paul in Ephesa a gingtute a deihsak leh a thumsakna ahi. Pathian in gingtute adia a thilgeelte a thupina a theihshiam theihna ding ua a lungtangte uh vaksak a aom ding Paul thumna ahi.

Tang 19. *“Huan, a gingta eite a thilhihtheihna thupina tehvuallouh, huai a hatna thilhihtheihna toh a sepzel bang in.”*

A tung a tang 17-18 toh a thugen kizom ahi a, Paul in a thumna tungtawn a gingtute'n a neih ding ua a deihsak (result) ahon gen beh lai hi. Gingtute hinkhua a nasem tehpihbei Pathian thilhihtheihna gingu te'n a theihshiam ding uh Paul in deihsak in huai ding in a thumsak hi. Paul in tehpihbei Pathian thilhihtheihna a gen otnopna in thilhihtheihna (power) genna thumal li – thilhihtheihna/ power (*dunamis*), sepna/ working (*energeia*), hatna/ strength (*kratos*), leh thahatna/ might (*ischys*) zangkhawm in phaktawp bei Pathian thilhihtheihna thupina taklang hi. Gingtute'n hiaite a neihna

ding ua thum hilou in, amau hinna a nasem hichikhop a thupi Pathian thilhihtheihna a phawkna ding ua thumsak ahi zaw.

Tang 20-21. *“Hiai thilhihtheihna bel misi lak a kipan a Khrist a kaihtoh a, vanmun a, a taklam a a tutsak hun a, lalnate, thuneihnate, thilhihtheihnate, vaihawmna tengteng tung leh tu khovel kia hilou a khovel hong tungding nangawn a minsak chiteng tunglam pek a a koih lai a a zat mah ahi.”*

Atung a tang 19na a tehpih bei Pathian thilhihtheihna thupi genchetna tang 20-21 ah hong kilang hi. Huai Pathian thilhihtheihna thupi tuh Jesu Khrist sihna apan kaihtawh ahihna tungtawn in Pathian in a taklang hi. Hiai tehpih bei Pathian thilhihtheihna kilatna ichi hiam aki zatna Paul in gendan chi li (4) in hon gen chian hi. Huaite- 1) misi lak a pan Khrist kaithou, 2) Van mun a a taklam a tusak, 3) A khenuai ah bangkim a koih, 4) Saptuam a ding in bangkim tung a lutang hihna apia.

Misi lak a kipan Khrist kaithou (t 20a). Sihna a kipan

Jesu Khrist thawhnawna (Resurrection) ichih Pathian thuneihna leh thilhihtheihna thupi kilatna ahih ban ah saptuam thugin kibulphuhna bulpi petmah ahi. Gingtu hinkhua adia a poimawh mahmah zia in Paul in leng a laikhak dangte ah tam veipi a gen kha hi (Rom 4:24; 6:4; 8:11, 34; 10:9; 1 Kor 15:4; Gal 1:1; 1 Thess 1:10). Paul in saptuam tawh kisai a sinsaknate leng thawhnawna thugin a kinga ahi. Jesu Khrist thounawn lou ana hi leh, I ginna a thawn ahi dia, khelhna a om den lai ihi ding uh chiin ana gen hi (1 Kor 15:17). Pathian in a thilhihtheihna thupitak zang a sihna apan Jesu Khrist kaithou ahi chi ahi.

Van mun a a taklam a tusak (t 20b). Sihna apan kaihthawh ahih zawh in Pathian taklam ah tutsak in a om a, huai tuh pahtawina leh thuneihna dinmun genna hi. Hiai a Paul kammal zat in Sam 110:1 tawh kizopna nei hi. “TOUPA’N, ka TOUPA kiang ah, na melmate na khengakna a ka bawl masiah ka taklam ah tu in achi hi” (Sam 110:1). Simmawh huai tak dinmun (sihna) apan in Pathian in a

thuneihna thupitak zang in a tapa Jesu Khrist thuneihna leh pahtawina apia hi (cf. Phil 1:6-11). Pathian in a ut te a domsang a, a ut te a neng niam thei mahmah hi. Tuabang sem ding a thuneihna nei ahihman in.

Tang 21na ah, Pathian in Jesu Khrist a pahtawi a, dinmun leh thuneihna sangtak a piak tawh kisai Paul in hon genbeh hi. Pathian in Jesu Khrist sihna apan kaithou in, van munte (heavenly realms) ah ama taklam ah a tusak hi. Huai tuh, lalnate, thuneihnate, thilhihtheihnate leh vaihawmna tengteng tunglam pek ah chihna ahi. A mah doutute tengteng tunglam ah thuneihna piak ahi. Sam 8:6na a, “Na khutsuak tung ah te thu na nei sak a; a khenuai ah bangpeuh na koih a..” chih lungsim a phawk kawm a Paul in hiai bang a gen ahih a gintakhuai. Paul in a gennop hiding a kilang tuh Jesu Khrist ichih amah doutu a melma hat mahmah teng sang a tungnung zaw leh thuneizaw dinmun ah Pathian in a koih chih ahi.

Lalna (arche) in dinmun leh thuneihna tawh kisai a amasa,

a bul, a kipatna lam genna a zat ahi. **Thuneihna** (*exousia*) in ut bangbang a nna sem thei dia zalenna/thuneihna nei chihna a kawk hi. **Thilhihtheihna** (*dunamis*) ichih Chiang in angelte tawh kisai a zat ahi tangpi a, hai mun ah Paul in angelte thilhihtheihna tung a Jesu Khrist thilhihtheihna genlang nuam hiding ahi. **Vaihawmnate** (*kuriotes*) ichih Chiang in Jesu Khrist thilteng tung a toupa ahihna (lordship), thil dang tengteng tung a thunei, vaihawmpa ahihna genna ahi. Thil tengteng bul leh tawp ahihna leng a genkha thei. “Min sak chiteng ...” chih English ah “every name that is named (ESV, NKJV, NET), “every title that can be given” (NIV, CSB) chi in ana gen. A gennop tuh mimal min hilou in mihing hiin angelte hitaleh, tulel a om leh hong om ding hita leh leng, hihna leh dinmun khat peuhpeuh sang in Khrist tungnung zaw ahihna ahi. Ama zek a a gen lalna, thuneihna, thilhihtheihna, vaihawmna chihte leng dinmun leh hihna (designation/rank/titles) hi vek uhi. Leitung ah hi-in vantung ah hileh, min, hihna leh dinmun om khempuhte tung a thunei

Jesu Khrist ahihna ahi. Paul in, “Jesu min a mi tengteng a khuk din ua, vantung, Leitung, leh leinuai a thil om tengteng leh, lei (tongue) tengteng in Jesu Khrist Pa Pathian thupina ding a Toupa ahi chih a puankhiak theihna ding un” ana chi hi (Phil 2:10-11).

Tang 22-23. “*Ama’n a khenuai ah bangkim a koih a, saptuam ading a bangkim tung a lutang in amah a bawl a, huai saptuam a pumpi ahi a, amah bangkim a bangkim hihdimpa taangchinna ahi.*”

Pathian thilhihtheihna thupi genkhiakna hon sunzom in, tang 22-23 ah Paul in Pathian in Jesu Khrist Leitung khua vannuai (universal) tung a Toupa ding in a bawl chihleh, tua in saptuamte nasep ding (mission) hon pia ahihna a hon gen hi. “Bangkim” chih in thil teng, ama lam a kigensate leh a melma te nangawn tung a thuneihna Jesu Khrist in a nei hi. Jesu Khrist kumpi thuneihna genna kammal ahi. “Lutang” (head) Greek ah *kephale* ahi. Gendan tuamtuam om mahleh, saptuam tawh kisai a akizat Chiang in, “thuneihna” (authority) genna ahi tangpi. Jesu Khrist saptuam

lutang ichih chiang in saptuam tung a thuneihna sangpen nei Jesu Khrist ahi chihna ahi. A thumal “head” (lutang) Thukhunthak ah 75 vei a kizang a, Paul in a laikhakte ah 18 vei a zang a, Ephesa laikhak ah 4 vei a zang hi.

Tang 23b ah, saptuam ichih “bangkim a bangkim hihdimpa taangchinna ahi” chi-in Paul in hihlchet beh hi. Paul gennop ahihleh, leitung pumpi a Pathian’ nna (mission) sem ding in Pathian in saptuamte a poimawh vanzat kingching tawh thuam in vualzawl ahi chih ahi. Leitung pumpi a Pathian lalgam ahong tunna ding saptuamte mawhpuak ahi. Huai nna sem ding in Jesu Khrist tungtawn in akingching thopna ingah uhi (cf Matthai 28: 18).

ZAWHNA: Ephesate 1:15-23 sung ah Paul in gingtute hinkhua a ginna leh itna muhtheih a kilangte ziak a Pathian kiang a kipahtu gen in, Pathian a theihchet semna ding un thumsak hi. Jesu Khrist sihna apan kaihtawh ahihna, **thil tengteng tung a thunei ahihna**, leh **saptuam lutang ahihnate’n** tehpihbei Pathian thilhihtheihna taklang hi. Tua thilhihtheihna thupi tak mah pansan a gingtute leitung pumpi a theihpihtu hiding a mawhpuakna piak a om ihi uh. En thilhihtheihna nei kei mahle hang a mission a kihel dia hon sampa lei leh van a thuneihna tengteng a khut a tawipa ahi chih phawk in, kuhkal leh muanhuai zaw sem a Toupa nna sem ding in kisa ni. ■



Gammial Aw

A dinkhawl theilou Missions nasepna a kalsuan zom theizel ding a hun hoih leh manpha hon pia i biak Pathian min in Gammial Aw simtute tengteng chibai aw! Khovel paidan kihei kilamdang mahleh Pathian chitna ziak in Missions Field a i nasepnate khawllou a paithei zel ahihman in kipahhuai i sa mahmah hi. Saptuamte’n naksem a semtute leh i sepna fieldte thumpih zel poimoh i sa hi. Hun dang a i sepdan toh tuhun a i

sepdan tampi khekngai omta ahihna ah semtu Missionaryte'n Pathian apan pilna mu a, tuate zang a kal hon suanzom zel theihna ding un A misiangthoute'n thumna tamsem a i phawk poimoh hi. Toupa'n Field a i kalsuanna tungtawn a gah hon piakte hiai anuai a bang in enkhawm nawn ni.

A. HIMALAYAN MISSIONS FIELD

KIPAHTHU GENNA LEH THUMNA DINGTE:

1. Toupa'n A misiangthoute thumnate hon dawng zel a, gingthak mi 8 (*Imsawa-1, Beldangi-1, Chisang-1, Budhabare-1, Dharampur-1, Haldibari-1, Padajungi-1 & Damak-1*) leh baptisna tangthak mi 15 (*Phidim-2, Kholaghari-2, Bihidin-2 & Chisang-9*) hon piakte ziak in kipahtu gen ni. Gingthak leh baptisna tangthakte khalam kalsuanna ding uh thumna in delhzui zel ni.
2. Pathian in a hunhun in Saptuamte thumna leh thilpiakte hon vualzawl in, a kuankhia Missionary-te tungtawn a sepna gah lohding honpiak zelte ziak in kipahtu gen ni.
3. April 02 – 04, 2024 sung Field Dorkate makaihna toh Faklung leh Bihidin ah gingu numeite mohpuakna chih thupi a nei in Seminar lamzangtak a zoh a omthei ahihman in kipahtu gen ni. Hiai hun in, Rev Dr Thangminlun Mangte, Field Superintendent leh Mrs Bimola Khudang Rai, President FDC te sinsaktu in pang uhi.
4. April 24 – 25, 2024 sung NEBC Phaizang Saptuam a omte a ding in Dorkate makaih in Seminar mun nih; Pathari leh Birtamode ah neih in om hi. Tua hun in, Nu Ching Mangte leh Nu Anita Rai te'n sinsakna manphatak pia uhi. Kipahtu gen in, Seminar hun a sinsakna piak a omte agahsuah kisinsakna hong hihna ding in thumna toh delhzui ni.
5. April 29 – May 01, 2024 sung NEBC Annual Khawmpi 32na Birtamode mun ah neih in om hi. Hiai hun in tukum thupi "Kipumkhatna" chih pansan in thutak genna hun Rev Dr S Vung Minthang, General Secretary, EBC in nei hi. Khawmpi gahsuah leh manpha honghih ngei i lamem hi.

B. DHEMAJI MISSIONS FIELD

KIPAHTHU GENNA LEH THUMNA DINGTE:

1. Field a Study Centre tungtawn a Toupa gamna sem a kalsuanna lamzang zel kipahtu gen ni. Study Centre nih Bongalmari

Study Centre leh Namgharia Study Centre te'n kivehtuahna manpha leh lohchingtak nanei theita ahihman un kipahhuai i sa a, EBCC Pityang a Study Centre a kaiding naupang Toupa'n hon piak behlap zel ziak in kipahthu gen ni.

2. Evan Chinkholal Lethil, Dakuakhana station a semtu in a sepna area sung a tuailaite Home Camp chih minvuah a March 13 – 15, 2024 sung a neihipih manpha leh gahsuahtak a zoh a omthei ahihman in kipahthu gen ni.
3. Pathian ompihna toh field in Lachangoan Study Centre March 20, 2024 in honna leh latna nei uhi. Hiai ni in Namgharia Study Centre apan naupang tamtak kihel thei ua, naupangte kimuhtuahna in khat-le-khat kal a hanthawanna a piak ngei i lamen hi.
4. Field sung ah gingtute lak ah tulai damlounhna tuamtuam nei om ahihman un amaute'n Pathian apan damna hoihtak hon ngahna ding un thumna in phawk ni. Unaunu Bobita Taw, Kapurdhuwa a khe leh mai baw kiam theilou ban ah, gingtu Mrs Gunamoti Payeng, Kapurdhuwa a om a tapa leng lungsim lam buaina nei tunitan a innkuante toh kithuzak theilou a om uh thumpih ni.
5. Pityang a om, Chandro Pait leh Bijoy Doley te gingtu hih lunggulh mahmah uh himahleh innkuante dalna ziak in masawn theilou in om uhi. Pathian in a inkuanpihte lungsim a thu a gen a, gingtu a hong kipiak theihna ding un thum ni.
6. Mr Pallap Doley, Lachangoan a khosa gingthak ahihnung in baptisna tangkhin himahleh tulai in lam chituamtuam a hihbuai in om a, sa-le-kha lam a damna a ngah theihna ding in thumpih ni.

C. MANIPUR MISSIONS FIELD

KIPAHTHU GENNA LEH THUMNA DINGTE:

1. Pathian pina toh Field in sum kumthak mu a kalsuan zom theilai ding a om man in kipahthu gen ni. Toupa'n A misiangthoute tungtawn a Field vualzawlina leh a hauhsakna a muhsakte ziak in Amin i phat hi.
2. Field nuai a Pathian Biakkhawmna mun i neihte Toupa'n a hon kepbitsak a, gingute'n Amah zalentak a hon biak zomzel theihna ding un thumna ah phawk ni. Manipur Phaizang a i

sepna mite lak a tangthupha zalentak a phuanzak a hih nawn theihna ding in Toupa kiang ah ngen ni.

3. Saptuam Quarters luahkiktheih a omte ziak in kipahtugen in, Quarters luahtu semtute leng Toupa'n a kepbitna ding in thumsak ni.
4. Native Casual Workers a sem Mr Johna pianna nu Mrs. Ayingthoibi in April 09, 2024 in hon beisan a, ani mah in Thanga Salam Huanmual a vuiliam in om hi. Anutsiat a inkuante Toupa khamuanna ngetsak ni.
5. Semtute lak ah damtheihna tasam mahmah Evan Manichaoba, Evan Surchandra, Evan Prembala leh Evan Th Priya te Toupa'n damna hoihtak a hon piaksakna ding in thumpih ni.
6. Tu Academic Session 2024-2025 a ding in Immanuel English School, Thiyam Konjin ah Naupang minkhum 310 vel phazou hi. School enkoltu Managing Committee, Saptuam leh Sinsaktute a ding in thum ni.
7. Field a gingtu omte tulai boruak ziakin a ginna uh etkhiak hun hongsuak ahihman in, gingtu i neihte uh a ginna ua a hong dinkip theih zelna ding uh leh Manipur a lemna leh muanna tunding hong hihna ding in thumna ah phawk ni.
8. Tangthupha puanzakna paitou zel ah tangthupha za hinapi a gingta nailoute leh thupukna bawlthei nailoute a ding in thum ni. Pathian tak a hon theih ua, Amah Hondampa a hon pomtheihna ding un thumpih ni.

D. HOJAI MISSIONS FIELD

KIPATHU GENNA LEH THUMNA DINGTE:

1. Field a semtute'n Toupa' pina tang in lam chituumtuam ah semthei zel uh kipahtu gen ni. Tuiton tungtawn a i sepna ah naupangte'n kumtawp exam a neihna uah gah kipahhuai tak muchiat thei ahihman un manpha mahmah i sa hi.
2. Semtute'n gingtu a kepte uh Mr. Sarat leh innkuante, Mr. Romen leh innkuante leh Mr. Ranjit te khalam a pichingtak a om theihna ding un thumpih ni.
3. Pathian ompihna tang a semtute'n Year plan thak a bawl bangbangte uh a hun hun a manphatak a hon sepsuah theihna ding un thumna in phawk ni.

E. DIMA HASAO MISSIONS FIELD

KIPAHTHU GENNA LEH THUMNA DINGTE:

1. Pathian ompihna toh semtute'n chidamtak in semzom theizel uhi. Kipahthu gen in, maban a Ministry a gahsuah leh lohchingtak a hong kizat theih zelna ding un thumpih ni. Sunday Fellowship hun ah a vangkim a kikhawm ding mi Pathian in hon pezel ahihman in kipahthu gen ni.
2. Assam a Politician-te leh Hindu sahkua makaite'n Christian leh sahkua dang huatna a neihte uh a tawpsan theihna ding un thum ni.
3. Semtute'n amau hihtheihna zahzah suah in Pathian thu gen in kalsuan theizel uhi. A thuza mite'n Pathian hing a muh chian theihna ding un thum ni.

F. GOALPARA MISSIONS FIELD

KIPAHTHU GENNA LEH THUMNA DINGTE:

1. Pathian ompihna toh semtute'n maban sawn in kalsuan zel thei uhi. Pathian kha ompihna toh innkuan a chidam a hon sepzom zel theihna ding un thumpih zel ni.
2. Semtute'n houlimpihsa a neihte uh a vangkim in veh thei zel uhi. Pathian in a hunhun a semtute lawmbawl theih ding hon piaksak zel ziak in kipahthu gen ni. Hiai hunte ah kithuahkhawmna manphatak neithe i zel ahihna uah kipahhuai i sa hi. Maban a leng sepding dan tuamtuam plan a neihlelte uh Pathian in kong a hon sakna ding in thum ni.

G. KAMRUP DISTRICT

KIPAHTHU GENNA leh THUMNA DINGTE

1. Loharghat Station a semtu Evan Daizachin leh innkuante'n Pathian ompihna toh chidam in sem sunzom theizel uhi. Amau sepna mun a Nuta Mrs. Torabati Rabha & Miss Anamita Rabha te'n Jesu Khrist gingga uh ahihdan a kam mahmah ua gen ahihman un kipahthu gen ni. Maban a ginna kip leh muanhuai a neihna ding un thumpih ni.
2. Khubdiya-Chandubi area a Mr. Abhigyan Rabha tonpih in i semtu in survey vabawl a, tua mun ah Khristian omlou a theih ahihna ah Toupa'n tukum sung a hiai area a sep theihna ding mun hon piakna ding in thum ni.

3. Loharghat mun a Mr. Indro Rabha te nupa toh i semtute'n ki meltheih tuahna va bawl thei uhi. Amah contractor ahiah ban ah society a leng mitallang khat himahleh Khristian lunglut a a society uh a lauh ziaik in ki-iim hi. Maban a Khristian hongsuah a, gingu muanhuai hong hihtheihna ding in thumna ah phawk ni.
4. Chaigoan Station semtu Evan Kaplun Paite leh a lawinu'n Rabhate khua mun tuamtuam sik in kalsuan sunzom thei zel ahiahman un kipahtu gen ni. A gam mite tangtak a Pathian thu genpiah theih louh ahiahna uah amaute BP-te check masa in huchi in tua kawmkawm in houlimpiahna neitheih uhi. Vanzat tuamtuamte zang a semtute'n tangthupha hon tangkoupiah zel theihna ding un thumpiah ni. ■



DORCAS

Corner

EBC media

DORCAS DAY THUPUAK – 2024

Hun haksa leh buaina tampite kal ah a hehpihna nou ngiingei a hon pi ziaik in Dorcas Day & Nute Nipini muthei nawn in i om a, hon makaihtu Pathian min i phat masa hi. Dorka Pawl mun chih a omte Hondampa Jesu Khrist min in itna chibai k'on buk hi.

'Ngai in, unaute kituak diamdiam a omkhawm anak hoih in a nuam mahmah hi'(Sam 133:1)

Bangdang teng sang in phatuamngai tak in ki-ittuah chiah unla; itna in gilou tampi akhuh zel (1Pet.4:8).

Kituaktak a omkhawm theihna ding in khat leh khat ki-ittuah ding ahi. Laisiangthou mah in, 'Ki-ittuahna loungal kuamah bangmah ba kei un; amah mihinpiah it pa'n dan a zuikimta hi' chi-in hon hih hi (Rom 13:8). Itna tuh dan zuihkimna hipah hi. Inkuan kipumkhatna Nupa ki-it, a kal uh chidam a omte insung ah kipan a amau hinkhua enton in a tate un amau mimal hinkhua chiah ah kipumkhat ding in panla uhi. Numeite'n inkuan kipumkhatna phuhkipna dia pan i lakna dingte:

1. **Kingainiam ding:** Numeite kiang a thupiak tuh, 'Zite aw, Toupa ah a kilawm hun bangzel in na pasalte uh kiang ah kingainiam un' chih ahi (Kol.3:18). Kingainiam a om theihna ding in i nupa kal ah Toupa pangsak gige lehang nupa kal chidam in kipumkhatna om ding hi.
2. **Panpihtu hi gige ding:** Nu, i hong hih chiang in inkuan kipumkhat sak ding a mohpuakna thupitak toh hong paikhawm hi. Tate pian ma leh pian nung in a kep leh don nute a ding a hihna thupi ahi a theihtawpsuah in i kem hi. Amaute panpih in a poimoh bangkim uh suktuahsak Nute i hi. A nuam leh haksa hinkhua a hon paltouh hun un hattak leh hangtak a a maituah theihna ding ua panpihna peding, lungmuan ding, thupukna lakpih a a lunglutnate uh theihpih tute i hi.
3. **Itna a om gige ding:** Khrist in i khelhna bang a hon thuklou in a itna ziak in van mun thupi nusia in Khros ah tatna nna hong sem hi. Eilam ah hoihna leh chitnate ziak a itna tangding hile'ng kiloh zoulou ding hi. Pathian mah in leng a dit didan in hon lamem lou a, a hehpihna ginna tungtawn a i sanding deih zaw hi. Huai hamphatna tangte ihi. Khrist itna a kigen chiang in Nu in a ta a itna toh tehpih in om zel hi. Pathian in Nute'n tate i it bangbang a hon it lel hilou in, Nute'n tate i itna uah Pathian itna thupidan a kichian sem in i thei hi. Pasal, amah kia in nupa a hitheikei a, numei khat toh hong kiten chiang in nupa hong hi uhi. Nupate'n Pathian vualzawl na ta leh nau hon nei in inkuan a hong hi ua, tua inkuan kipumkhatna phuhkip a khangsak ding in ei Numeite'n hamphatna nei i hi. Theihtawp suah a pasalte kiang ah kiniamkhiak in, inkuanpihte a ding a panpihtu muanhuai hiding leh Khrist itna tungtawn a itna a omgige ding in Toupa'n hon vualzawl hen. ■

DORCED LEH DOTPROJ HUHNA

1. *EBCC Lailam Veng TBDC akipan a huhna 15,000/- kimu hi.*
2. *EBCC Bukpi TBCD in Sumtang leh Bal, Malta, Maisan, Maipuang, Munphiah hon khakte uh sumsuah in avek in 7,110/- kimu hi.*

Hiai a huhna hon khak Dorcate Toupa'n vualzawl in makaih zel hen.



CHILDREN'S *Corner*

KEN NU NEILOU:

Toupa ompihna toh hunte hong pai zel in, kum khat sunga ni poimoh tuamtuam i zatzelte uh lakah Nute' ni hong tung nawn hi. Hiai ni tuh a diak in Naupangte a dingin manpha in gennei biik a bang hi. A ziak tuh, Nute leh naupangte ki-chimatna leh ki-itna sanga kizopna lianzaw omdia aw chih theihkhop hial a kizopna thuk ahiziak ahi. Mun khenkhat ah naupangte'n a nute' uh a itdan thugelh hoih taktak nei in lungkhoih mahmah thu tapi gelhkhe thei uhi.

Tua bang ahihlai in, hiai bang hun ah i sukkhak nop leh Pathian min a i hanthawn nop tuh, bangchidan hiam a NU chih ding ana nei nawnloute ahi uhi. Pate' ni hitaleh, Nute' ni hitaleh tuabang mite a sukkhak dan chituam om ahihman in, hiai bang hun ah Pathian deih bang lungsim i na neih khak kei leh, kipahna ni hilou a khitui luanna ni, diphawmna ni leh ni ngaklah huailoutak suak thei ahihman in pilvanhuai hi.

HINKHUA A THILTUAH: Damsung hun tomchik sung ah Pathian in lam chituamtuam ah hon pi in, a chang in kipahhuai isak mahmahte bang, a chang in dahhuai isak mahmahte bang ah a honpi hi. Tuate tuh i thiltuahte ahi a, en bangchi'n i ngaihtuah a chihte khen lampek ah hon tuaksaktu in bangziak a hon tuaksak hi hiam chih pen a poimoh zawtham hi. Bang chichi hiam a Nu chih ding ina neih nawnlouh khak pen leng damsung hun a i thiltuah poimoh mahmah khat ahi hi. Khasiat huai tak bang, hehhuai leh lunglen huaitak bang leng ahikha thei a, hileleng tuni'n Pathian min in theisiam kawm lehang uthuai isak tuh, huai pen i damsung hun a i thiltuah khat hiding a tung Pathian hon lampi totsak ahi. Vangsiat man ahi kei a, itlouh/deihlouh man leng hisam lou in Pathian geldan ahi. Tung Pathian lemgel mihing in, a leilam/salam mit kia a a etleh a theisiam zoukei hi. Pathian in *“Van lei sang a a sangzaw bang in, ka omdante na omdan sang in a sangzaw hi, ka ngaihtuahte leng na ngaihtuahte uh sang in a sang lai hi.* Isai 55:9 achi hi. Huaiziakin i thiltuah, haksa isak mahmahte, mihing etna leh ngaihtuahna tan kia a en mai lou in,

a limlian zaw ah “**i hoihna ding a nasempa**” (Romte 8:28) Pathian muhdan koppih theih i sawm ding uhi. Laphuaktu in “*Sian lemgel hinkhua ka thuahte, a ziak a hang tun ka theilou zong, bukim a akiang ka tun chiang in, nopna bukim toh Sian min phat ning*” ana chi a, a thiltuah a theisiam mahmah hi.

THILTUAH TUNGTAWN MIDANGTE HANTHAWNTU (COUNSELLOR) : Nu-le-pa a neilaite sangin Nu-Pa chih ding nanei nawnlou te’n Nu-le-pa manphatna leh amau toh insung a omkhop nuam ahildan a theichian zaw uhi. Khenkhatte ngial in houh a Nu-le-pa’n a dampih lai ua hoih leh kipaktak a ana omsak khaklough nate khong uh kisikhuai asa mahmah uhi. I Lamka khopi ah tu laitak inleng, tua banga Nu-le-pa manphatna theilou, thumanglou leh amaute simmoh tampi om uhi. Khenkhat ngial in houh imut limtak a leng imusak theilou in, lungkhamtak in omsak uh a, zu-le-sa peuh kham in tawngtawng uhi. Amaute thuhilhtu ding i poimoh lua hi. **KEN NU NEI NAWNLOU** ka hi chi a, kingaisia leh Nute’ Ni khawng a lungleng leh khasetak a om a, mite apan kibumang mailou in, Pathian min a na hong dinkhiak poimoh hilou hiam! Laisiangthou in hon suangtute zahtak ding leh, amaute manphatna hiai zah a a gen lai in tuabang theilou kongzing ah pumdim gawpta hilou hiam? Na thiltuah tungtawn in Toupa’n hon zat utna om tham ding ahi. Toupa’n a mawkna in thil hon tuaksak ngei kei. Joseph a sanggamte ngoihngoih in deihlou a a zuakkhiak lai un, ‘kei zawkuamah deihlough mi vangsia ka hi’ chih theih dinmun ahi. Himahleh aman, hinkhua a a thiltuahte tungtawn in Pathian ompihna a chian semsem a, kial thupitak ah simang mai ding a pa leh a sanggamte banah Aigupta mite hondamtu in a pang hi. Tua mah bangin, i tulai khovel: Nu-le-pa zahtak louh ziak a kise gawp inkuan, insung maitam kichip ziaikin i khotang buaigawp lakah nang, na thiltuahte tungtawn a mite lamdik a pitu hidia Toupa’n hon zangthei ahi chih mangilh lou a, Pathian adia nahong kizat poimoh lua hi.

THUKHITNA: Nute’ ni a hong tung ding hi. Hiai ni hong pianna san zaw bang dang hilou in, hon suangtu i Nu pahtawi theih bangbang a pahtawi ding chih ahi. Nang tuabanga pahtawi ding Nu nei nawnlou nahi zong in, nu manphatna leh hon dampih lai a pahtawi tuak ahildan a theichiang mahmah mikhat nahita hi. Tuabang theilou mi khat bek na houlimpih a, na thiltuah tungtawn a hanthawanna leh tundingna nna nasep ding i Toupa’n deih hi. ■



EBC Innsung Thu

CES THANLON IN STAFF QUARTERS THAK HONG:

April 3, 2024 [Nilaini] in Rev. T. Thangzasion, DS, EBC Thanlon Division in CES Thanlon Staff Quarters thak honna leh Pathian kiang a latna nei hi. Hiai Quarters bawlina ding a kithuahpihna pia tengteng tung ah hiai Khristian Thukizakna tungtawn in kipahthu gen uhi. ■

BWA, APBF LEH NCBCI BAPTIST LEADERS TE'N DELHI AH HUN HONG ZANG UH:

Baptist World Alliance (BWA) a CEO & Gen. Secretary, Rev. Dr. Elijah M. Brown, Asia Pacific Baptist Federation (APBF) a General Secretary, Rev. Dr. Vesekhoyi Tetseo (Dr. Vee) leh National Council of Baptist Churches in India (NCBCI) a General Secretary, Rev. Samaresh Nayak te India gamsung mun tuamtuam a phakna uah Delhi mun dated 8th April, 2024 in hongtung uhi. Nitak dak 6.30 pm in Delhi a Baptist Saptuam tuamtuam a Leaders mi 50 veel toh amau Dignitaries thumte kimuhkhawmna hun 'GIVE Centre,' 19 Raj Niwas Marg, Delhi ah BMS (Baptist Missionary Society), BCTA (Baptist Church Trust Association) leh BUNI (Baptist Union of North India) te inntekna nuai ah Banquet meeting-cum-Felicitation programme neih in om hi. Amaute'n thupitak in ana vaidawn ua, Delhi mun a Baptist Leaders tamzawte leng hong paikhawm thei uhi.

Programme kizatdan: Welcome address: Padmashree Mr. K.A. Sangtam, President BCTA in hon nei. Tua zoh in, Delhi a Baptist leaders mi 50 veel paikhawmte'n Self introduction nei in mahni Saptuam a panmun leh saptuam toh kisai pulakna kinei chiat. Mr. Sumeet Nath, Manager, BMS India in BMS India toh kisai hon genchian hi. Dignitary thum te'n Greetings message leh ministries paillele pulakna hon nei uhi.

Hiai hun ah BWA CEO Rev. Dr. Brown in 23rd Baptist World Congress: Living the Good News, Brisbane, Australia mun ah 7th -12th July, 2025 sung om ding chih thu hon pulak hi. Details thei nuam ten hiai website – bwabrisbane.com ah leng et theih ding. Rev. Samaresh Nayak in NCBCI

society leh registration vai te hon gen a, Upa Thangzalun Khuptong, Member, NCBCI toh pangkhawm a kisai lel ahihdan hon gen. Rev. Dr. Vesekhoyi Tetseo in APBF Youth conference omding toh kisai hon pulak hi. 29th May - 1st June, 2024 in Bayou Lagoon Park Resort, Melaka, Malaysia ah omding, Tuailaite a tam thei lam hong kihel thei le uh chih chialna hon bawl. Hiai conference kum 5 hal a om zel ahi.

Hiai kikhop khawmna hun khakna leh ankuanglatna Rev. Solomon David, Secretary&Treasurer, Baptist Union of India in nei. Programme zoh in Fellowship dinner paikhawmten nei uhi.

~ **Report petu: Upa Thangzalun Khuptong, Co Opted Member, NCBCI** ■

Thu Tuamtuum

KHALOH LAKMASAKPEN PIA

Miss Lianbiaksiam d/o Upa V. Kamzabiak EBCC KHOMINTHANG in AIIMS, Bhubaneswar Odhisa ah Nursing Officer sema, a khaloh lak masakpen First Salary for Missionary Field chi a Pathian kianga kipah thugenna in hon pia hi. Pathian in a maban hunah leng vualzawl in ompih touzel hen.

- **Upa T. Langkhogin, Secretary TBUC, EBCC Khominthang.**

Miss Lydia Vungliananching d/o K Chinthanlian V Munhoih a om in Senior Administrative Asst. (SAA) Military Engineering Service (MES) Shillong a sepna amuh Toupa vualzawlina ahi chih thei in kipahthu genna in a khaloh lak masakpen TBUC, EBCC V Munhoih ah hon pia hi. Toupa laukawma asepa Nekzonna Dohkan Pulpit Nasepa a zang gige thei ding in Toupan vualzawl in makaih tawntung hen.

- **Upa V Tualkhansong, Secretary, TBUC, EBCC V Munhoih**

Miss Ngainemkim d/o S Khamsuanthang EBCC Vaal Veng a om in Branch Post Master (BPM) Gobok Post Office, Chakpikarong, Chandel District, Manipur a sepna amuh Toupa vualzawlina ahi chih thei in kipahthu genna in a khaloh lak masakpen Local Saptuam EBCC Vaal Veng ah hon pia hi. Toupan a sepna ah vualzawl in makaih tawntung hen.

- **Upa T Thangzahau, Secretary, TBUC, EBCC Vaal Veng**



Ordain Sunna

1. Min: REV DR. B GINNEI THANG
2. Pianni: April 03, 1948
3. Pianna Khua: Parvatawm (Parvachawm)
4. Pianthak Hun: August 17, 1971
5. Pa Min: (L) Mr. B Chinkhothang Ngaihte
6. Nu Min: (L) Mrs Ngemdon Tombing
7. Zi min: Mrs. Niangkhanhing
8. Kitenni: December 8, 1982



Kitengsak tu: Pastor H Lalzem

- | | | |
|--------------------------------|----------|----------|
| 9. Gil a gah goutan neihzah: 2 | Pasal: 1 | Numei: 1 |
| 10. Tu melmuh zah: 3 | Pasal: 0 | Numei: 3 |

11. Tulel a omna Saptuam: EBCC Guwahati
12. Tulel a kizatna: SIM te nuai ah Mobilisation dan in sem hi.
13. Ordain Kum: January 8, 1980, Ordain Petu: Rev T Jamkhothang
14. Toupa kiang a tawldam ni: April 01, 2024, Vui ni: April 05, 2024
15. Vuitu Pastor & Saptuam: Pastor T Songkhanthang, EBCC Hebron
16. Natna: Cancer

17. A tanchin gelbeh nop: 1973 kum in EBC a fulltime worker ding in kipan a, 1987 kum in gamdang a thangthupha gen ding in kuankhia uhi. 2019 chiang in kum 45 bang sem ta hi. India leh International Missionary in Toupa a ding in muanhuai leh ginom tak in sem a, OMF ah kum taktak a sep nung in hong penson in SIM te toh North-East lam a mohpuakna piak a om bang in Guwahati pansan in a sihni dong in sem hi. Theological college tuamtuum North-east leh international ah visiting lecturer in leng a na sem kha hi. A damlai in laibu tuamtuum gelh in tua laibute mi tamtak in hamphatpih leh phattuampih mahmah uhi.

Tangval fel leh kizentak Khovel nopsakna leh hauhsakna deih hun laitak a Pathian gam nasem ding a kipekhia ahihna ah mithupi mahmah ahihna kilang hi. Missions nasepna awlmohna lian mahmah in ama hinkhua tungtawn in tuailai tamtakte hinkhua sukha mahmah mi khat ahi.


Toupa Khasiangthou in a nutsiat a inkuan leh Saptuamte khamuan in makaih zel hen. ■


1. Min: UPA GINKHOPAU
2. Pianni: 1934
3. Pianna Khua: Tungzang, Chin Hills
4. Pianthak Hun:
5. Baptisma: 1965
Baptistu: Pastor Khawizachin
6. Pa Min: Gozadal Hatlang
7. Nu Min: Vungzaniang
8. Zi min: Kimlamchiin (2014 a sihsan)
9. Kitenni: 1967 Kitengsak tu: Pastor Khawizachin
10. Zi Min: Nu Awidonlun (Zi thak)
Kitenni: 2019, Kitengsak tu: Pastor Dr Suankhanhau
11. Gil a gah goutan neihzah: 7 Pasal: 3 Numei: 4
12. Tu melmuh zah: 30 Tusawn: 8 Total 38
13. Tulel a omna Saptuam: EBCC Hiangmun
14. Tulel a kizatna: TBUC Member
15. Ordain Kum: 1983 Ordain Petu: Rev Liankhosiam
16. Pahtakna lai san kum: 2008
17. Toupa kiang a tawldam ni: April 07, 2024, Vui ni: April 07, 2024
18. Vuitu Pastor & Saptuam: Pastor B Chinkhengoupau, EBCC Hiangmun
19. Natna: Teknat
20. A tanchin gelbeh nop: 1945 January kha in a pan Hiangmun khua satpih hi. Sanggam a upen ahih toh vaihawmna leh inkuan vai a kihel tou den hi. Lai pawl 3 passed a, lai simthei, Solfa siam masa leh la lunglut mi ahi. 1976 in Hiangmun ah EBC (ECC) dingkhia in amah makaitu in pang hi. Kum 14 sung bang Hiangmun ah Local Chiarman in pang den hi. Toupa nasep, Laisiangthou thu sut leh thugente a utlam ahitoh kiva mahmah hi.
Gamvak lunglut mahmah mi ahi a, gamsa leng tamkhoptak man in pasalpha chihmin loh hial hi. Khotang vai ah leng dinmun poimoh taktak ana len kha hi. Hiangmun ah damdawi inn gina omlou ahihman in a damlai in khosung a doctor bang a kizang manpha mahmah mi khat ahi, damlou kiensak te a pan sum lalou in aman lehpanpih zaw hi.
Amah mi chidam thei mahmah ahi a, a upat deuhdeuh chiang in hatlouhna tuamtuam hon nei a doctor ki-ensak in CT-Scan khong la mahleh a natna hiai chih a muh ding doctor in neilou a tekmat leh hatnawnlou chih himai hi. A it leh ngaih tampi



nusia in a muan Toupa kiang khawltawldam ding in hiai leitung khualzinna date April 07, 2024 in ana tawldam ta hi.

Toupa Khasiangthou in a nutsiat a inkuan leh Saptuamte khamuan in makaih zel hen. ■

1. Min: UPA N GINSUANZHANG
2. Pianni: June 21, 1960
3. Pianna Khua: Hanship
4. Pa Min: (L) N Kamthawn
5. Nu Min: (L) Tualzaniang
6. Zi min: Mrs. Khupzangai
7. Kitenni: February 03, 1983
8. Gil a gah goutan neihzah: 6
Pasal: 1 Numei: 5
9. Tu melmuh zah: 3
10. Tulel a omna Saptuam: EBCC Kanaan
11. Tulel a kizatna: TBUC Member
12. Ordain Kum: 2004 Ordain Petu: Rev Dr. Luaichinthang
13. Pahtakna lai san kum: Active lai 
14. Toupa kiang a tawldam ni: April 15, 2024, Vui ni: April 15, 2024
15. Vuitu Pastor & Saptuam: Pastor M Thangkhenmung, EBCC Kanaan
16. Natna: May 06, 2022 a mi intung bawl a omna a kia, a pumpi a tangtheilou huai nat pih ahi.
17. A tanchin gelbeh nop: 1980 kum in Assam Regt. a va pang a kum 2 vel a sep nung in a nu deihna bang in kitawp hi. Mi phatuamngai leh mi kizen mahmah khat ahi. Football pek bang leng a khote un phatuam a sak mahmahte lak a khat ahi. Nasep thanuam khutsiam mahmah leh thagum nei mahmah khat ahi. Saptuam ah leng amah hihtheihna zahzah a sem leh kizang mi ahi.
May 06, 2022 in a veng ua mi inntung bawl kia in, a pumpi tangtheilou in om a, damdawi inn tuamtuam a etkol ahihning in inn mun ah tu a sihni tan pha in ki enkol den ahi. Haksatna khenlam ah amuan leh a nna asepe Toupa'n a kiang a tawldam ding in April 15, 2024 in hon laksak ta hi.



Toupa Khasiangthou in a nutsiat a inkuan leh Saptuamte khamuan in makaih zel hen. ■



Kipahthu Genna THUMNA MAKAI

MAY 2024

1 NILAINI: May kha honpitung i biak Pathian kianga kipahthu gen in, manpha leh gahsuahtak a izat chiat theihna ding in thum ni. May 1-5 sung EBCC Vengnuam in Papi Camp neiding a, Evan. Upa Lianding Guite thugenpi in pangding, Camp lohching leh gahsuaah ahihna ding in thumna ah phawk ni.

2 NINGANI: Nekzonna Dohkan Pulpit Nasepna toh kisai Pathian huhna toh paihoihzel. Khominthang a Mission Inn pansan a Coaching la a laisim in tulel in Tuailai 13 omlel uh. Amaute etkaina Evan Ginkhenmung Guite in semlel hi. Amaute ading in Pathian ompihna leh makaihna ngen in thumpih ni.

3 SINTAWPNI: May 4-5 sung EBCC Thanlon in Second Coming chialpi neiding a, Rev Gin Malsawm, Principal, GBC in Pathian thutak gending. Chialpi lohching leh gahsuaah ahihna ding in thumna ah phawk ni. EBCC Dinthar, Aizawl ah, Aizawl khopi a om saptuam 3 te kigawm in NDPN toh kisai kisinsakna omlel, manpha leh gahsuaah ahihna ding in thumpih ni.

4 KIGINNI: DotProj- puankhui zilna ah batch 7na mi 15 ten April khabul in puankhui zil panta uh. Lohching tak

a honzil suak theihna ding un thumna ah phawk ni.

5 NIPINI: May 6-7, Missionary Day huam in Rev Gin Malsawm, Principal, GBC in Lamka Baptist Church ah Pathian thutak gen in hun zangding, thumna ah phawk ni.

6 SEPPATNI: Zingchiang in EBC Saptuam omna munteng ah Missionary Day kizangding. Thugentute ading leh programte Lohching leh gahsuaah tak a zat ahihchiat theihna ding in thum ni. May 8-11 sung Gospel Centenary Hall pansan in Lamka North leh South huam a om, nekzonna tuam tuam neite a ding in Nekzonna Dohkan Pulpit Nasepna toh kisai kisinsakna omding. Sinsaktu dingte; Rev Dr S Vung Minthang, GS, Rev K Kamchinkhup, DMs leh Dr Tonsing Samuel Mungpu. Kisinsakna manpha leh lohching ahihna ding in thum ni.

7 SEPNAWNNI: Missionary Day ahihtoh kiton in Tanchinhoih hon puaktute ziak a kipahthu gen in, eite leng midang leh nam dangte adia missionary Day tuntu hiding in Pathian vualzawlina ngen in thum ni.

8 **NILAINI:** May 10-12 sung EBCC Newlane in Nute Ni zangding a, Rev Gin Malsawm, Principal, GBC thugenpi in pangding, thumpih ni. May 9-12 sung EBCC Bangalore in Naupang Hotdamna Camp neiding a, Rev M Ginminthang, Child Co-ordinator leh Pastor B Chinkhengoupau thugenpi in pangding uh, thumpih ni.

9 **NINGANI:** May 10-12 sung EBCC Dorcas veng ah Nute Ni zangin Evan Lianding Guite in Pathian thutak gending, thumna ah phawk ni.

10 **SINTAWPNI:** May 10-12 sung in Rev Nenglian Vualnam, Director of Development in EBCC Bungmual ah Nute Ni zang in Pathian thutak gending. Khasiangthou pawlna ngen in thumpih ni.

11 **KIGINNI:** May 10-12 sung Dorcas Day huam in Nu Nemngaih mawi, Dorcas Co-ordinator in EBCC Kolkata ah hun zang in thutak gen ding, thumna ah phawk ni.

12 **NIPINI:** Tuni Dorcas Day ahihtoh kiton a saptuam chih a dorca pawl in Pathian muanhuaina leh vualzawlina atanchiat theihna ding un thum ni.

13 **SEPPATNI:** Tualsung Saptuam chih a BYF lapawl leh Worship teamte ziak a kipahthu gen in, Pathian in amaute manphasem a azatna ding in thumna ah phawk ni.

14 **SEPNAWNNI:** Rev Dr Ginnei Thang Ngaihte in April 01 in thupina mun ah honna paisanta, a nutsiat a inkuante a ding in Pathian khamuanna

ngetsak in thumpih lai ni. Himalayan mission field a field exposure a omlel Sawitak mi 4 te ading in Pathian ompihna leh makaihna ngen in thumpih ni.

15 **NILAINI:** May 16-18 sung EBCC Bethany in Dorcas Pawl makaihna in chialpi neiding a, Evan. Upa Lianding Guite thugenpi in pangding. Pathian Kha pawlna ngen in thumpih ni.

16 **NINGANI:** May 16-17 sung Singngat Division in Division level Upa Ordain leh Tual Upate huam in seminar neiding a, Rev Thawndoulian, Director of Ministries leh a team in sinsak ding, kisinsakna lohching ahihna ding in thumna ah phawk ni.

17 **SINTAWPNI:** May 18-20 sung EBCC Enpum in Second Coming Chialpi neiding a, Rev Gin Malsawm, Principal, GBC in Pathian thutak gending. Chialpi lohching ahihna ding in thumpih ni.

18 **KIGINNI:** Rev K Kamchinkhup, Director of Missions in EBCC Aizawl South, Tlangnuam ah Penticost Day zangin Pathian thutak gending a, Rev Thawndoulian, Director of Ministries in EBCC Zenhang Lamka leh Rev Nenglian Vualnam, Director, Development in Lamka Baptist Church ah thugenna hun zang ding, thumna ah phawk ni.

19 **NIPINI:** Tuni Khasiangthou piak ni, Penticost Day ziak a kipahthu gen in, Pathian a kipan Kha diktak tanga, michih hihhalh a omna ding in thum ni.

20 SEPPATNI: EBC Headquarters, Dorcas Hall a sem, GS, Director te leh office staff te ziak a kipahtu gen in, amauten Pathian deihna banga honsep zel theihna ding un thumpih ni.

21 SEPNAWNNI: May 21-25 sung EBCC B Kalzang in Olive Retreat Centre ah Hotdamna Camp neiding a, Rev Gin Malsawm, Principal, GBC leh Pastor T Daikhankhup thugenpi in pangding, camp lohching leh gahsuah ahihna ding in thumna ah phawk ni.

22 NILAINI: Mizoram Division sunga semtute, Rev S Thang Johnson, Ds, Office staff te, division sunga Pastor te leh school a semte ziak a kipahtu gen in, amauten Ana sem dinga hotel Pathian deihna banga honsep zomzel theihna ding un thumpih ni.

23 NINGANI: I gam leh nam, adiak in Paite mite lak a lemna leh muanna diktak tunding a om nawna ding in, kingainiam a Pathian naih in, A kiang ah kiniamkhiak in thum ni.

24 SINTAWPNI: Dorcas Hall, Division Office te leh Field Office te a fel leh kizentak a sum hon saisakte ziak a kipahtu gen in, amauten Pathian pilna leh muanhuaina koppih a honsepzom zel theihna ding un thumpih ni.

25 KIGINNI: Gamsung buaina toh kisai a gamgi vengbit dia om volunteerte kipiakzohna ziak a kipahtu gen in, amauten kuhkal leh muanhuaitak a gamgite hon venbitzel theihna ding un Pathian ompihna ngen in thumpih ni.

26 NIPINI: WEC tungtawn a missionary i sawlkhiakte ziak a kipahtu gen in, amauten Pathian mission theichiansem a honsep chiat theihna ding un thumpih ni.

27 SEPPATNI: May 29- June 01 sung APBY Conference, 2024 Malaysia ah omding a, EBC a kipan in Rev V Thangkhanmuan, YC, Rev M Ginminthang, CC, Lalmangaih Hauzel leh Pastor M Thangkhenmung te vakihel ding uh. Khawmpi lohching leh gahsuah ahihna ding in thumna ah phawk ni.

28 SEPNAWNNI: Saptuam school ten May 29- June 05 tan term-1 exam neiding uh, thumna ah phawk ni.

29 NILAINI: Pastor screening a omlel sawltak 4 ten Himalayan Mission Field a khakhat field exposure hun a zatzoh utoh kiton in Dhamaji field ah June khasung omnawn ding uh. Thumna ah phawk ni.

30 NINGANI: May 31- June 01 sung Central Dorcas Sub Committee (CDSC) vaisaina in Centenary Hall Auditorium ah “Numei Manpha” chih thupi a nei in “Lehlang Camp” omding a, Miss Liankhoman leh Miss Niangsangching thugenpi in pangding uh. Pathian ompihna leh makaihna ngen in thumpih ni.

31 SINTAWPNI: May khatawp tan honpitung i biak Pathian kiang kipahtu gen in, i hikhhelh omte ah A ngaihdamna ngen in thum ni. ■



GRACE BIBLE COLLEGE
REGD. NO. 45/86 UNDER ACT XXI OF 1860/REGD. NO. 19416002187 UNDER FCRA 1976
ACCREDITED BY ASIA THEOLOGICAL ASSOCIATION
NEW LAMKA 795006, CHURACHANDPUR, MANIPUR

TEACH, ENTRUST & WITNESS | 2 TIMOTHY 2:21
☎ +91-3874-350063 [Office]
info@gracebiblecollege.in / www.gracebiblecollege.in

ADMISSION NOTICE

April 09, 2024

No. GBC/GAD(NAD)/2(09)/2024: Grace Bible College a Pathian thu sinnuam, piangthak leh Pathian sapna kichiantak tangte a dingin Admission form anuai a Course te ading in hawmkhiak hita hi. Thuchian zaw Office ah muhtheih gige hi.

Sl. No	Programs of study	Duration of study	Essential Qualifications
01	Master of Divinity	Secular Graduate te a dingin kum 3; ATA/Senate of Serampore nuai a B. Th Grade 'B' a zoute ading in kum 2	Secular Graduate or B. Th ATA/ Serampore nuai a zoute.
02	Bachelor of Theology,	Kum 3 sin ding	Class XII zousa hiam Diploma in Theology zousa,
03	Diploma in Theology	Kum 2 sin ding	Class X zousa te.
04.	Ministerial Training Course (Galzilna)	Kum 2 sunga zawh ding	Class VIII zousate deihtuam biik ahi.

Lunglutna neite adi'n Office ah hiam www.gracebiblecollege.in ah muh theih ding hi. Ngetna form bukim May 27, 2024 tan in college ah piaklut ding ahi. May 29, 2024 ni in Admission Test om dia, May 30, 2024 in personal interview om ding hi. MTC te ngetna June 28, 2024 tan in piaklut theih ding.

A poimoh mahmahte ading in Scholarship a om hi.

Sd/- Chinkhenthang Guite
Registrar

Postal Regd. No. MNP 07 | Regd. No. 22344/70

BOOK POST

If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



HAPPY MOTHER'S DAY

Edited & Published by Rev. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006